

# *KUTEETA BWÀ KWENZELA*

## *NZAMBÌ MUDIMU KACIYI*

### *DISWA DYÀ NZAMBÌ*



Tùshaalààyikù biimànyine kuulu mpindyewu bwa katanci patùdi twenza disambila apa. Twinyikààyi mitu yetu.

Mukalenge, tudi ne disanka mu dinda emu bwa kwikala baalùkile mu nzubu wa Nzambi, mu dikwàbò disangisha. Nenku tudi tulomba, Nzambi, bwa Wèwè kutùlongololakù mu dinda emu ku bilema byetu byònsò. Tùleejèku kajila kaùdi Wèwè mutume díyi bwa twètù kwendelamu. Ne tùpèèshèku ngàsà ne dinanga Dyebe, bwa twamona mwa kulonda tujila atu ne mèyi a kulonda awu ne myoyi yetu yònsò, bwa twàsanganyibwakù, mu dituku adi, mu Kilisto, katùyi ne kadyuwù, bwalu tudi twitabuuja, Mukalenge, ne dimweneka Dyèndè didi abidi àdi panshi aa.

<sup>2</sup> Tudi tumona bimanyinu byònsò byàkambàYe ne nebyènzekè ku Dilwa Dyèndè abi, munkaci mwa kukumbana mpindyewu. Nenku ne disanka dyònsò tudi bindile dyòdi díbà adi. Anu mùvwà Abraham wa kale awu mwindile mwànà mulaya amu, nenku pa kumona bimanyinu bya ndekeelu bya Nzambi abi bipweka pa buloba, díbà adi yèyè wàkamanya ne kabivwa mwa kwenza ntàntà mule mwànà awu kàyi mulwe to. Ne mpindyewu nyewu tucimona cyènzeka cyakabidi. Yesu mmutwàmbile ne: “Pààbangà maalu aa kwenzeka,” twabànduluka, bwalu bupikudi bwetu—bwetu bùkaadi bùseemena, “dipampakana dya cikondo, dikenga munkaci mwa matunga, dikanka dya buloba mu myaba mishilèshilàngàne, mbù ùkungula, myoyi ya bantu yàmba kwimana bwa bwòwà.”

<sup>3</sup> Tudi bamanye ne tudi mu dyòdi díbà adi, mùdi matunga kaàyi mamanye cya dyenza. Mvita mikwabo yènda yilwa, mùdibi bimwèka. S'ncifwànyine kwikala cintu cya cikwacisha bwòwà's! Buloba munkaci mwa kukòsoloka, beena maalu a mamanya bàmba ne cintu kampanda cya cikwacisha bwòwà cidi pabwipi. Tudi tumona Bible wàmba cyòci eci. Nenku, Mukalenge, tùkwàcishèku leelu ewu bwa twikalè biimàne mu nzubu wa dilongolwela bilema ewu, ne tùpetèku mèyi matùma a kùdi Nzambi wetù, bwa kuya kumpala mu díbà dya mîdimà edi, bwa kukenkesha Bukènkè, bwalu ncifwànyine kwikala wetù mpùngà wa ndekeelu bwa kwenza nanku. Bwalu tudi tulomba nunku mu Dinà dya Yesu ne bwa bwalu Bwèndè. Amen.

Sòmbaayi.

<sup>4</sup> Ncya bushuwa ne ndi mbala eci bu dyèsè dinene, dya kwikala mwaba ewu mu tabernacle mu dinda emu. Kadi nwatùfwilaayikù luse bu mutùdi katùyi ne myaba ya kusòmba, myaba yònsò, bwenu nwènù. Ne mwaba mwine mmùle tente, ne bantu biimàne kuulu myaba yònsò pambelu.

Nwènù bàdi pambelu abu mpindyewu, nudi mwa kuumvwila cyôci eci ku bisanji byenu. Nyewu ngápù mwoyi. . . [Muntu kampana ùdi wàmba ne: “Makumi ataanu ne itaanu too ne ku makumi ataanu ne mwandamutekete.”—Muf.] Makumi ataanu ne itaanu too ne ku makumi ataanu ne mwandamutekete. Nwènù bàdi pambelu abu, ne mu myaba ya kwimanyikila màshinyi mwàmwa, ne mu misèèsù, nudi mwa kuumvwila cyôci eci ku bisanji byenu, pankaci pàà makumi ataanu ne itaanu ne makumi ataanu ne mwandamutekete pa kalonda kàà cisanji cyebe. Pa nanku tudi bateete. . .

<sup>5</sup> Mvwa mwalùkile, menemene, mulwe kaaba aka, bwa kuteetakù bwa kwenza masangisha a matuku dikumi, bwa kwakula pa cyena-bwalu cya *Mpànzà Yà Ndekeelu Mwandamutekètè*. Bwalu, munkaci mwa Mpànzà ayi mùdi Mpungi. Nenku mvwa nzwambila mu. . . pàmvwà ne cya kuyiisha pa Mpungi Mwandamutekete ne, nèmbitwàlè pamwe ne Mpànzà ne Bipùpù. Nenku mvwa ngeela meeji ne ncifwànyine kwikala cikondo cimpè. Ncivwa mfuminakù ku Afrike, ne—ne bânà kabàyi banji kuya mu diikisha to.

Mwanàànyì mukese wa balume ewu, Joseph, ùvwa—ùvwa bu mulwe ndambu. . . ne dijinga dya ndambu wa mbingu bwa kulongakù pa mushindu wèndè wà kubala. Ùvwa mubànde, eyo, kadi kàvwa pa cipidi cikumbàne to. Pa nanku twètù kumulama mu Tucson, pa nanku, pàmvwà mu Afrike apu, nenku yèyè kutungunuka ne dibala dyèndè adi ne kudipetululayè mu dyôdi, mu tulaasa kampanda.

Ki pashiishe twètù kwalukila. Nenku mvwa ngeela meeji ne, pàvwà bânà mu diikisha apu, mvwa mufwànyinekù kwenza kaadisangisha kakese mwab'ewu ne bantu, bwa kuyiisha byena-bwalu ebi. Kadi patwàfikì muneemu, twètù kusangana ne katùvwa mwa kupeta dibàlaasà dya tulaasa adi to.

<sup>6</sup> Ne mèmè mvwa mumanye ne tabernacle kàvwa ùkumbana bwa kupèesha bantu myaba ya disòmba to, ne kubàshiyakù bacyankàme mu mushindu wùvwàbi bìkèngela bwa bôbò kwikala pàdìbo. . . pàndì nyiisha Diyiisha edi apu, ki bwa cinyi kutùkèngelabi bwa—bwa kulongolola maalù mushindu mukwabo. Nenku pamutu pàà kwangata malòòlò dikumi atùvwà tulongolola bwa kwangata awu, ee, ndi mucivwijè anu bwa masangisha abidi mu dyalumingu dyònsò; edi dyalumingu, dyalumingu didi dilondà, ne dyalumingu dyàlondà adi nanku,

masangisha abidi abidi. Pa nanku, kadi twètù biine katwènakù bacifidile dimanyisha to.

Nenku, díbà adi, bu muntu muumvwè mu mushindu kampana bàmba ne masangisha àvwa ne cya kubanga mu matuku a ngondo makumi abidi ne mwandamukulu, ku díbàlaasà dya tulaasa aku, bu Nzambi mwa kwanyisha, ee, wèwèku ne balunda ne mwikàle ne myaba milamisha ku bilààlà-beenyi, ndi—ndi muswe—cya kwenza nkuumusha dilamisha adi, nwamonu's, bwalu bàdi—bàdi, katwena ne mushindu wà kupeta dyumvwangana bwa kupeta mwaba awu to. Kabeena mwa kupeta màbàlaasà a tulaasa awu to.

<sup>7</sup> Nenku mpindyewu, ndi muswe kwakula anu pa masangisha a butangadiki mu dyalumingu mu dinda. Ne mu dyalumingu dilòlò ndi muswe kwenza disambila bwa babeedi. Nenku tudi ne dyeyemena dya ne Nzambi neätwilanganèku neenu nwènù bàdi babeedi abu. Ncyèna mumanye mwikalà Billy mwa kutàngila bwalu bwenu to; ndi ncinka ne, yèyè neàbanyè twarta twa disambila, anyì mwònsò mwènzàye amu, mushindu wa kukòntonona bantu. Kadi netwènzè cyònsò citùdiku mwa kwenza aci bwa kusambidila muntu ne muntu mu mbingu yònsò yisatu yitùdi tujinga bwa kwenza masangisha eyi, cyòci ciikàle diswa dya Mukalenge.

<sup>8</sup> Ne pashìshe misangu yàbùngì kùtu miyiiki ya babidi, muntu kampana muswe anu kumonangana neebe katanci kakese pa cintu kampana anyì cintu kampana cya mushindu awu. Nenku netwikalè mwa . . . Mbanganyi mwab'ewu bàdi baswe muiiki wà babidi? Tùmonààyibi cyanza. Éyì! Washààla nganyi? Pa nanku tudi . . .

<sup>9</sup> Nebìikalè bikole ndambu bwa kutwilangana naabò, pa nanku fùnda dilomba dyebe ùditùmè, nùàfilaaayi kùdi Billy, díbà adi mémè ndi mwa kuàngacila kwòkù aku. Nenku, mpindyewu, yèyè neàfilè dimanyisha, ngeela meeji, bwa twarta twa disambila, díbà dyònsò dyàkèngelàbi bwa kutwàbanya adi.

<sup>10</sup> Mbanganyi bàà ku bânà beetu bambi bàdi kaaba aka mu dinda emu? Katwena bapete mpungà wa, ncyèna ngeela meeji ne . . . Nudi basekèlèlekù bamwe bàà kùdìbo anyi? Mbanganyi bàdi bambi kaaba aka mu dinda emu, nudikù mwa kwela byanza muulu anyi? Anyi, juukilaayikù kuulu. Tùmonèbi ne mbambi búngì kaayi bàdi mu disangisha mu dinda emu. Ee, mbìmpè! Mukalenge twasakidila bwa bantu aba. Mvwakù mwa kujinga bwa twìkalakù ne díbà dya kusekelela muntu ne muntu wa kùdìbo, kadi ndi mutwìshùbwe ne nudi babàmòne. Nenku tudi . . . Nzambi mmubàmanyè mu mudimu wàbò, ne tudi tulomba bwa Nzambi àbàbènèshèku mu mushindu mubanjike. Nenku, kakùyi mpatà to, bààbùngì bàà kùdìbo mbakàngè masangisha àbò, bwakwikalabo mwaba ewu. Mwaneetu Junior Jackson, ngeela meeji, ne Mwaneetu Don Ruddell, ne kwòkù aku

tudyòmbà etu tùdi tùkafika mu ekeleeziya yabo. Ne pashìshe, kabidi, mu New York ne mu mikwabo myaba mu ditunga dijimà, eci cìyaayakù kupicila ku telefone ya bantu mu ekeleeziya ne ekeleeziya yònsò mu dinda emu.

<sup>11</sup> Ndi ne disanka dya kumona Mwaneetu Richard Blair musòmbè mwab'ewu. Ndi mfuma ku dibala mukanda mumfùndila pa cintu cinènè cidì Nzambi mwenze munkaci mwa bantu kuntwaku. Dituku adi, mùndi ngumvwa bàmba... Ndi mwa kwikala mutupakane's, Mwaneetu Blair; mèmè mutupakane, ùndongòlòlè. Úvwa wènzà mudimu, wàmbulwisha muntu kampanda ku dyela dya nshinga ya nzembu mu ditempu dya màshinyì anyì cintu kampanda, ngeela meeji mmùvwàbi. Ndi mubale mukanda mumfùndila awu. Kadi kupindulabo cintu kampanda, nenku, mu mushindu kampanda, kutùmaci nzembu mu màyi mùvwà mwànà wa balume mutekete ùsanganyiibwa, umwe...mu—muntu mwena ditempu dya màshinyì adi, mwanèndè mutekete wa balume, kànà kàà balume kakese nàka's, nenku kushebeyaci mwanà mutekete wa balume awu. Ne difu dyèndè kuuladi. Tudi bamanyè cikùminà cya nzembu aci, mbwena kwamba ne, pàdiye ùfwa, ki cidì cyènzekà. Twìsù tukese atu kupàtukatù mu nyama; mènù kudìkàngawù.

<sup>12</sup> Kukwacishaci bânà beetu bàà balume abu bwôwà bya bibi be. Mwaneetu Blair kwelaye meeji ne uvwa mwa kumpeta mwaba kampanda, bwa mèmè kusambidila mwànà awu, kadi kuvulukaye ne bivwa ne: “Mwaba wònsò wùdi babidi anyi basatu badìsangìshe mu Dìna Dyànyì, Mèmè ndi mwaba awu munkaci mwabo.” Kadi taatù ùkaavwa mufyonòke minu pàvwàye ùteeta bwa kubweja minu mukana mwa mwànà wa balume mutekete awu, bwa kumùkàngula. Kadi bòbò kutwà binù e kudìtwabò mu disambidila mwànà wa balume mutekete awu, ne yèyè kwalukila cyakabidi ku mwoyi.

<sup>13</sup> Cìvwa ncyà bushuwa anyi, Mwaneetu Blair? Umwe wa ku bânà beetu bàà lulamatu mwaba ewu. Kaa, mwànà wa balume mutekete awu's ùdi kaaba aka. Ee, Mukalenge twasakidila. Abi mbìmpè be. Tudi baswe bwa ùjuukilèku kuulu, wèwè mwanàànyì wa balume. Mpindyewu, tudi twela Mukalenge munanga twasakidila bwa cyòci eci. Awu ki tatwèndè mwine wa mwànà wa balume mutekete awu anyi? Ki wèwè tatwèndè anyi? Ncyà bushuwa. Nenku's ki Mwaneetu Richard Blair nyèyè ewu. Nzambi wetù twètù ùdi ne bukole bwa kwenza cintu kanà cyònsò. Eyowa's, mukalenge. Yèyè mmucilayè. Tudi ne mwoyi mu Bwikadi bwa Nzambi, bwa Taatù wa mu Dyulu, munene, wa butumbi. Ne bintu byònsò bitùdi. . . bìdi mwa kwenzeka bu twètù anu mwa kuciitabuujà.

<sup>14</sup> Nudi numona cidì cyòci aci cyènza, difutu dyàkafilàci bwa nsòmbelu wa muntu awu pa kwitabuujà cyòci aci anyi? Cyàkasùngila mwanèndè mutekete wa balume awu. Mpindyewu, Nzambi ùvwa ne basadidi Bèndè bàà lulamatu kuntwaku,

bwa . . . Mwaneetu Blair ne bakwabo abu, bwa kusambidilabo mwànà mutekete wa balume awu pàvwàye mu ngiikādilù awu apu. Eyowa, pàdì bwalu kanà bwònsò bwènzeka, vùlukàayi ne, nudi bânà bàà Nzambi udi ne mwoyi.

“Mwaba wònsò wùdì babidi anyì bapìte apu badisangishe mu Dìnà Dyànyì, Mémè ndi mwaba awu.” Ne bààkafùnda kabidi ne: “Yèyè ùdì dikwacisha mene didì anukù dībà dyònsò mu dībà dya lutatu.” Kacya ní kùkaadikù lutatu, s’ùvwa mmwànà mutekete wa balume awu mulàadika mwaba awu, mufwe, panshi apu, ku cikùminà cya nzembu yàkamubwelà mu mubidi ayi. Pa nanku tudi twela Nzambi twasakidila mu dinda emu, ne myoyi yetu yònsò, bwa—bwa maalu aa àdìYe mutwènzèle.

<sup>15</sup> Nzambi àbeneshèku balume bàà lulamatu aba, bóbò pààbò. Mu cikondo cya njuwu ya cìmpicìmpi ki mu cyòcì cikondo aci mùdì mùkèngelà kweyemena Nzambi. Kadi ikàlà muMweyemene, ikàlà Nendè mu bulunda kumpala kwa njiwu ya cìmpicìmpi kulwayi. Tudi bamanyè bwalu ebu. Twètù tulengeleela Nzambi, tudi mwa kuMulomba cintu kanà cyònsò, mùdì mufwànyìne kulomba mulunda mukwabo kanà yònsò ewu, ne Yèyè ùdì dikwacisha mene didì anukù dībà dyònsò mu dībà dya lutatu.

<sup>16</sup> Mvwa mutuutakeene mu mùsèèsù, makeelela awu, ne mwanaabo wa bakaji wa Mwaneetu John Martin. Mvwa . . . Muntu kampanda ùvwa mungiimanyike mu mùsèèsù amu, ne muntu kupicilaye mwaba wùmvwà awu ne kunkùpayè cyanza. Mu dyalukila dya kumbelu, nudi bamanyè’s, wèwè udi umona bantu myaba yònsò, biimana bakwela mwoyi ku cyanza, ne bikwabo. Nenku inábànzà ewu, ndi mvuluka ne bàvwa bambiikile ku telefone anu abidi àdì panshi aa, bamba ne kùvwa muntu kampanda mudìtuutè kùdì yèyè inábànzà ewu, mu kàshinyì, bamuzaazè mwongo kuumukila anu kuulu too ne kwìnshi. Ùvwa ne cya kushààla mucibùkile panshi matuku èndè ónsò a mwoyi. Mmusòmbe mu disangisha emu mu dinda emu, munkaci mwa kusankila Bwikadi bwa Nzambi. Ndi mufume ku diyiikilangana nendè mu bìrò emu. Ndi muswe kusambila nendè, cyakabidi. Kadi ùvwa . . . Ùdì kaaba aka mwaba kampanda. Ngeela meeji ne kí mmupete mushindu wà kubwela cyakabidi to.

Kadi, monaayi, cya bushuwa, s’nyèyè ewu mmusòmbe anu mwab’ewu pabwìpì neetu apa. Ncya bushuwa. Udikù mwa kujuukila kuulu bwa katanci kakese cyanàànà anyì, mwaneetu wa bakaji, bwa bantu bààmònakù mwa . . . Kì inábànzà nyèyè ewu uvwa ngangabuka mwambe, kùkaadi ndambu wa matuku ne, kààdyàkwendelakù kuulu to, mwongo muzaaza ne bikwabo byònsò, bifùmine ku njuwu—njuwu. Kadi’s nyèyè awu mwimànyìne kuulu, mujimà ne bujimà bwèndè.

Nudi bamanye's, Bible mmwambe ne: "Nenku kabàvwa mwa kwamba cintu nansha cimwe cya cibèngàngàne naaci to, bwalu muntu awu ùvwa mwimane munkaci mwabo." Ncya bushuwa. Mwànà mukese wa balume's nyéyè ewu, mubiishibwe ku bafwe, ne mukaji ne mwongo muzaaza's nyéyè ewu, mwimane kuulu munkaci mwetu. Abi mbìdì bifúme ku dyenzeka, pa nanku Yéyè ùdi umwèumwè awu makeelela, leelu, too ne kashidi. Dìna dya Mukalenge dibeneshiibwè! Mushindu mwine wùvwàbi bikèngela bwa twètù kwikala ne disanka dya kwikala ne mwoyi mpindyewu mu Bwikadi Bwèndè, ne kumanya ne Yéyè ùdi dikwacisha mene dìdì anukù dībà dyònsò edi mu dībà dya lutatu.

Ndi ne disanka dya kumònakù Mwaneetu Vayle, Mwaneetu Martin, ne búngibù mwab'ewu mu dinda emu. Mukalenge ànùbènèshè nwènù bânà beetu, mu mushindu mubanjike. Mpindyewu bìdì. . .

<sup>17</sup> Ndi mumanye ne kakwena citaleela citàmbètàmbe búngì munda emu, ne musumbà wònsò wà bantu ewu, kadi pààbì, pàmvwà muumuke mu Tucson dituku adi, kuulu kùvwa kwa degrés mitwe ku makumi anaayi anyì makumi anaayi ne citùpà. Ne pabwìpì ne mundankulu, kuulu kùvwa kwa degrés makumi asatu ne inaayi, nenku kuulu nkwiimpè menemene bwa wányì mubidi. Kadi ku Parker bàvwa bàmba ne kuulu kùvwa kwa degrés makumi mwandamutekete ne umwe, mu diitànù kumpala kwa twètù kuumuka. Nenku's nudikù mwa kudifwànyikijila luuya lukole alu. Mu bushuwa bwa bwalu, amu mmu cipeela.

<sup>18</sup> Nenku, mpindyewu, maadyalumingu asatu àdì àlondà aa. Leelu, dya dikumi ne itaanu, ngeela meeji, mmwòmò anyì, anyì ndikumi ne isambombo; dikumi ne ataanu, kì mmwòmò anyì? Dya dikumi ne mwandamukulu, ne dya makumi abidi ne mwandamukulu, ne dya kumpala dya ngondo wa mwandamukulu, (mmwòmò anyì?) Ngondo wa mwandamukulu. Dya makumi abidi ne itaanu. . .Dya dikumi ne mwandamukulu, dya makumi abidi ne itaanu, ne dya kumpala, nekwikalè masangisha ku tabernacle. Kanwikadi, nudi bamanye's, kanwikadi nwâya katangalaja luumu alu bipitèpìte to, bwalu, nudi numona's, katwena mwa kupetela bàdimu, bàdì apa mpindyewu abu, mwaba munda emu to, nudi bamanye's, nenku nebitambè anu kubiipa. Wèwè alukila anu nàka pawìkalà ne mushindu.

<sup>19</sup> Ne ndi mwaba ewu mbwa kusangisha balubuludi. Mu mushindu kampanda ndi bu muumùshibwe mu byònsò ebi ne biikàle bàmbengela mwaba wà kwenzela disangisha, pààbì mèmè mulombòdìibwe bwa kudyènza. Pa nanku ndi ngeela meeji ne nènkonkè ní katwènakù mwa kwangata ntentà wetù awu ne—ne kumwasa, ne kushààla anu mwaba awu, nudi bamanye's. Kupàtuka apa mu cipalu cya ndundu emu, anyì mu ferme kampanda, ne kumutentemuna kuumuka pa mwaba kuya pa mukwabo, anu mwàlombolà Mukalenge amu. Ne mèmè ndi

ndyumvwa ne aci ki cyènzàYe. Nudi bamanyè's, kùdi cikeena-kumona pa bwalu abu. Ne ndi ngeela meeji ne pàmwápa ki cìdi cyènza ne cyôci eci cyènzekè... Mpindyewu, nudi bamanyè's, misangu yábûngì tutu tudyàmbidila ne mbibì be bwalu bintu kampana bidì byènzeka, kadi, nudi bamanyè's, aci's ncifwànyine kwikala Nzambi, nwamonu's, mwikàle ùnùsàka mu bintu ebi. Piikalàbi ne, Yèyè ngudi mucyàmbè, Yèyè's ngwacyènza.

<sup>20</sup> Kùkaadi malòlò ndambu, bààbûngì bàà kunùdì, anu bu ngondo mujimà nanku kumpala kwa mêmè kuya mu Afrike, pàmwápa bààbûngì bàà kunùdì bàdi ne mukaba ya mèyi awu, bàà ku nwènù bàdi ne mikaba ya mèyi, pa, *Disungula Dya Mukàji Wa Kusèla*, uvwa muyiishibwe mu Californie awu. Ndambu wa tusunsa twa ndekeelu twa mukaba awu, ncyèna mvùlukakù ne mvwamù to. Kadi Nyuma wa Mukalenge ùvwa mubwele mu mushindu wà dikema's. Mvwa mbàpiisha bwa mushindu wa nsòmbelu wùvwàbo nendè ne bivwàbo bènza, ne paanyima pàà Evanjeeliyo mumane kuyiishibwa ne mwambiibwe bikole menemene kumpala kwabo. Pashiishe, dyakamwe, ki Nyuma Mwimpè kwakula ne kwamba ne: "Kaa-pènùmà," nwamonu's, "wèwè cimenga cìdi cìdibìikilà mu dìnà dya banjelo awu," ki Los Angeles awu, "udi mubàndishibwe too ne mu Dyulu, kadi nèupwekeshibwè too ne mu iferno." Nwamonu anyi? Ne pashiishe paanyima pàà kumane kujika, mona's, mvwa nsanganyibwa pambelu, ne Mwaneetu Mosley ne Billy biikàle naanyi. Nenu kwambabo... Bòbò kwalukila e kutàngila, ne panshi pònsò apu pàvwa pùle tente ne bantu balààle, bambi munkaci mwa kudila mayadi.

<sup>21</sup> Ki mêmè kuya e kwangata Mufundu awu. Mêmè kwamba ne: "Kùdi cintu cyàmba bwa bwalu abu mu Bible."

Nenu Yesu nguvwa utàndisha Kaa-pènùmà, bimenga byònsò bya kumpenga kwa mbù bivwàye mukùmbùle abi. Mona's, kwambaYe ne: "Kaa-pènùmà, wèwè udi mubàndishibwe too ne mu Dyulu awu, nèupwekeshibwè too ne mu iferno." KwambaYe ne: "Bwalu bu ne byenzedi bidì byenjibwe mwebe ebi bivwa byenjibwe mu Sodomà ne Gomòlà, nunku's bòbò mbashààle too ne leelu ewu." Ne mwine musangu awu, Sodomà ne Gomòlà bivwa bisanganyibwa mwinsi mwa mbù.

Nenu anu paanyima pàà cyôci aci, pàmwápa mpaanyima pàà bidimu bu lukama nanku, paanyima pàà ciprofeta cya Yesu aci, Kaa-pènùmà, cimenga cimwepele cya kumpenga kwa mbù civwàye mukùmbùle, dikanka dya buloba dyàkacitùkija mu mâyi a mbù. Ne nwènù's nudi bamanyè ne aci ki civwa dyandamuna dya buludi kùdi Californie, kùdi Los Angeles.

<sup>22</sup> Ne pashiishe mu Tucson dituku adi, ndi mwenze anu ngaalukila, dikanka dinene dya buloba kwenzekadi kuntwaku. Ne beena maalu a mamanya bàvwa ku télévisión munkaci mwa

kucizòla. Cìvwa mu bikàndàkàndà. Bàmba ne, buloba, dituku adi, mbwelè mutanta kuumukila anu ku Îles Aléoutiennes, anyi kuumukila ku Alaska, mu nyungulukilu wa Îles Aléoutiennes, ntántà wa wipacila kilòmèètà nkama yisatu ne makumi abidi mu mbû, mwalùkile ku San Diego, munyùngùlùke Los Angèles, ne mupàtùkile ku San Diego. Nenku mmubaaluluke cintimètres yàbùngì. Nzubu mmyupuke. Nzubu ya bilààla-beenyi mmitùkine.

Ki bàvwà mu muyiiki wa ku tudyombà abu kwelabo—kwelabo beena maalu a mamanya lukonko. Kwambabo ne: “Ee, aci’s ncifwànyine kutùkina dīngà dituku’s?”

<sup>23</sup> Awu kwamba ne: “Cifwànyine? Necitukinè!” Ki kwambaye mēnà a mu maalu a mamanya a mùdì musàbusabu wà mu buloba awu. . . Wòwò awu ki wùdì mwenzèje dikanka dya buloba edi too ne kwònsò aku, mu nyungulukilu wa San Diego too ne mwinsi amu. Cikaadi mwaba wà cyondòkondòkò awu. Kadi patùdì twakulangana apa cyònsò aci cikaadi cibangè kupandika, cyenzè bu lusenga lwikàle lùdìshika, kadi mpindyewu cikaadi anu cizubuzubu. Ne cikaadi cibaalùlùke, centimètres yàbùngì. Bàvwà mwa kwangata tulòndò twa mpolondo ne bikwabo, ne kwenda kulondesha mutanta awu, ne kwenzapù bimanyinu, ne kumona kùkaavwàwu.

Ne wùkaadi mubaalùlùke, centimètres yàbùngì kabidi, pàmwàpa centimètres yitaanu anyi mwandamukulu, dituku adi, anu pàfumu ciprofeta aci ku difidiibwa.

Nenku aba bàvwà bèela beena maalu a mamanya nkonko abu, kwambabo ne: “Ee, pàmwàpa kacýàkwenzeka mu cikondo cyetu twètù eci to.”

<sup>24</sup> Awu kwambaye ne: “Ncifwànyine kwenzeka mu tusunsa tutaanu anyi mu bidimu bitaanu; kadi necidìshikè.”

<sup>25</sup> Mandamu Simpson, ncyēna ngeela meeji ne yēyè ùdi neetu leelu ewu to. Anyi, ndi mmona Mwaneetu Fred musòmbè kaaba aka, kadi ncyēna mumanye ne Mandamu Simpson udi penyì to. Yēyè ùvwa muye kangata ciprofeta cìmvwà mufile, bu mu cidimu cya 1935 nanku awu anyi cintu bu nanku, nenku cyàmba ne: “Cikondo necilwe,” ncifùnda mu mukanda mwaba kampanda, “cìikalà mbù mwa kabwela too ne mu cipeela.”

Tàngilàayi numone cìikalà mwa kwenzeka. Bu binunu bya kilòmèètà bivudija ku binunu bya kilòmèètà abi bwa kutùkina mu musàbusabu wà mu buloba awu, ne kusenunukamù, nekùfwe bantu miliyò musangu wumwe. Ne ciine aci’s necyènzejè divwala dya màyi a mbù! Vùlukàayi ne, too ne ku Mbù wa Salton kwàka, buloba mbupweke ne mètres makumi asatu anyi makumi asambombo kutàmba kwinsi kwa mbù. Pàmwàpa màyi awu neàlwe too ne pabwìpi ne Tucson, ne divwala dya màyi a mbù dyàpicilàmù adi. “Ne mbù neàkabwelè too ne mu cipeela.”



Matunga àkaadi àpanduluka, Izaleela nyewu  
 ùtabuluka,  
 Bimanyinu byàkadyànjlà baprofeta beetu  
 kwamba;  
 Matuku a bàà Bisàmbà bya bendè mmabala,  
 mùle tente ne bintu bìdì bìkwàcishà bwòwà;  
 “Alùkilaayi, Éyì nwènù bàdì batangàlàjìibwe,  
 kùdì beenu.”

<sup>26</sup> Tudi mu cikondo cya nshiikidilu. Mpindyewu, Mukalenge ànùbènèshèku mu mushindu mubanjike. Ndi nditwa mu dibyàkula mpwà mwoyi dībā. Netùjiminè lukasa, ne lukasa lwónsò, tubwela mu Cyendeleele, nansha bya munyi.

<sup>27</sup> Nenu mpindyewu mu Maakò Munsantu, nshapita wa 7 ku mvensa wa 7, bwa kufilakù dyumvwija ku cyena-bwalu civwà cibadiibwe mu Kulondolola wa Kumpala 13 amu. Bwa kupetakù dyumvwija ku cyòcì eci, ndi muswe Maakò 7.7.

. . . bàdì bànkukwila mu cijengu, bàlongeshangana  
 mèyì matùma a bantu bu ne ki dilongesha.

<sup>28</sup> Mpindyewu, mèmè ncyènàku ne cìndì mumanye to pa kuumusha anu Mukenji wùdì Mukalenge mumpèèshe, ne ki cyònsò cìndìku mwa kwakulapù. Nenu mpindyewu, ndi muswe kwakula pa cyena-bwalu mu dinda emu cìndì mèmè mwele meeji ne necikalè cimpè. Nenu dilòòò edi ndi muswe kwakula pa ne, “cyakudya mu movù wàcì,” bu Mukalenge mwa kwanyisha: *Cyàkudyà Cyà Nyumà Mu Muvù Wàcì*, ne mushindu wà kuCipeta. Mpindyewu, mu dinda emu: *Kuteeta Bwà Kwenzela Nzambi Mudimu Kaciyi Diswa Dyà Nzambi*.

<sup>29</sup> Nzambi mmudishikàmine. Ne tudi tumona kaaba aka cyàkenzà Davidi, mu kubala kwa Mufundù wà Kulondolola wa Kumpala 13. Ne yèyè ùvwa . . . Meeji èndè àvwa mimpè. Kadi Nzambi kèna ùtùpèèsha dikumbanyina bwa meeji mimpè to. Kùdì mushindu au wumwepele bwa kukwàcila Nzambi mudimu, mmu kwenza kwa diswa Dyèndè ku díyi Dyèndè ditùma. Nenu Nzambi, mwikàle mudishikàmine, kakwèna muntu nansha umwe bwa kuMwambila cya dyenza anyi mwa kucyènza to. Yèyè ùdì ùcyènza mu mushindu, wùdìYe mmumanye ne mmushindu mujaalame wa kucyènza. Ne aci cidì cyènza ne ndyūmvwèku bimpè. Ne bìvwa bikèngela bwa kwenzaci ne twètù bònsò tūdyūmvwè bimpè, ne ndi mutwishìibwe ne ki mùdici cyènza. Bwalu, muntu mmufwànyine kuswa bwa kulwaCi munshindu *kampanda*, ne mukwabo muswe bwa kuyaCi mushindu *kansanga*, ne mukwabo mushindu mukwabo.

<sup>30</sup> Kadi cintu cimwepele cya cinène, kabidi, pa bìdì bitàngilà Nzambi ncya ne, Yèyè, mpindyewu, kàtu mutùshiyekù katùyì bamanyè cidì Bulelela ne mwa kucyènza to. Yèyè kì mmufwànyine kwikala mwakane to, mu kutūnyooka bwa dyenza cintu citùdì katùyì bamanye mùvwàcì mwa kwenjiibwa,

ne pashiishe kutùshiya tutànkakana tukadyèla mu cintu kampanda. Yèyè kèna Nzambi wa mushindu awu nansha. Yèyè ùdi Nzambi wa wàmba Dìyì ne ùtèkemena ne bânà Bèndè nebàDitàbùùjè. Nenku, ki bwa cinyi, Yèyè mmumanye cidi citàmbe bwimpè, ne dîbà dya kucyènza, ne mwa kucyènza mwine. Twètù tutu ne yetu mmwènenu pa bwalu abu, kadi Yèyè ngudi mumanye.

<sup>31</sup> Ne pashiishe Yèyè mutèèke ndongolwelu kampanda, wíkalaYe mwa kwenza, kadi kàyi mutwámBILE cìvwà mwa kwenzeka ne mùvwàci mwa kwenzeka, dîbà adi twètù, mu kulendukilapu, tudi bafwànyine—bafwànyine kubingishiibwa mu—mu kulendukilapu kwetu aku; anyi, mu kuteeta bwa kwenza cintu kampanda, muntu yònsò mmufwànyine kubingishiibwa. Kadi kùdi njila anu umwepele, ne mwine awu n'Dìyì Dyèndè.

<sup>32</sup> Ne cikwabo cintu, Davidi mwaba ewu, tudi tumona ne mu mwoyi wèndè yèyè ùvwa muswe kwenza cintu cìvwà cìmpè. Kàvwa ne kabingilà kabi nansha kamwe, anyi kiipàcila kabi to. Kadi, nzubu, anyi mushèètè wà cipungidi wà Mukalenge, wùvwa kule ne—ne cisàmbà, nenku yèyè ùvwa muswe kwaluja mushèètè wà cipungidi wà Nzambi mu mwaba wàwù, bwa bantu kwikalabo bàkonka Nzambi pa bidì bitàngilà maalu àvwàbo baswè.

<sup>33</sup> Pamutu pàà—pàà kulekela anu bwalu abu nanku, twètù. . . Ambààyibi tǔng bu ne Mwaneetu Blair ne tatwèndè wa mwànà mukese wa balume awu bambe ne: “Ee, ndyakabi’s, mwànà’s wàmanyi anu kutàpika, wàmanyi kufwa. ngeela meeji ne, cidi anu ncintu cyenzèke pààci nanku’s”? Kadi bôbò bàakaya lubilu kùdi Nzambi.

<sup>34</sup> Ambààyibi tǔng bu ne inàbànza mutekete awu, ne bàyèndè, mwambi mujimà wa Evanjeeliyo, kùkaavwa malòlò ndambu, anyi matuku, pàvwà inàbànza mutekete awu muzaajike mwongo apu, yèyè udi ufuma ku dijuukila kuulu ewu. . . Ngangabuka ùvwa mwambe ne: “Yèyè neàshaalè mucibùkile panshi matuku èndè ònsò a mwoyi.” Ambààyibi tǔng bu ne yèyè ne bàyèndè bàvwa bambe ne: “Ee, munanga wanyi, netwikalè anu tusàmbangana pèètù bwa cyôci aci’s”? Kadi bôbò ne lukasa lwònsò bàakenza cintu kampanda pa bwalu abu; bàakaya kùdi Nzambi. Bintu búngibi mu Bible emu bitùdi bafwànyine kuleedila’s wè, bya mùdi bantu bàpeta lutatu, bàya kùdi Nzambi!

<sup>35</sup> Ee, musangu awu, mu matuku awu, bàvwa ne mwaba wà ditwilangana anu wumwepele mùvwàbo mwa kutwilangana ne Nzambi, ne kùvwa nku mushèètè wà cipungidi, mwinshi mwa mashi. Ki cìcìdi kabidi mwaba wumwepele wa kutwilangana, mwinshi mwa Mashi. Nkwasa wa ngàsà bàvwa bàmyaminapù mashi, bwa kufwila mukuukwidi luse, anyi mulombi, pàvwàye

ùlwa bwa kwenza dilòmba kùdì Nzambi. Kadi Nzambi ùvwa ne mushingà wà pabwàwù, njila uvwa ukèngela bwa wèwè kulonda, wèwè peèbè, bwa bwalu abu, ne Yèyè kàvwa mufwànyìnekù kwitaba nì ncinyì nì ncinyì cikwabo cyònsò nansha. Yèyè kàvwa mufwànyìnekù kwitaba cikwabo cintu cidyanjila kulongolola to; anu njila udiYè Yèyè mulongolole awu.

<sup>36</sup> Anu matuku makese aa ndi mufùme ku diyiisha Diyiisha kampana, bààbùngì bàà kunùdì mbaDimanyè, dya ne, mwaba anu wumwepele mulongola wùdì Nzambi ùtwilangana ne mukuukwidi, mwaba wàkambàYe ne: “Nèntèekèlè Dìná Dyànyì.” Bu twètù mwa kusanganakù ekeleeziya mùdìYe mutèeke Dìná Dyèndè, dìbà adì’s twàpecì wòwò mwaba awu. Yèyè mmwambe ne: “Ncyàkukubèneshila mu biibi byònsò to; anu mu biibi bìndì mutèekele Dìná Dyànyì. Nènditèekè mu mwaba wumwepele, ne bìdì bikèngela bwa wèwè kusambakeena Naanyì mwòmò amu; nenku ki mwaba wumwepele wùNgàasambakeenà neebe.” Nenku twàsangànyì ne, mwòmò amu, mùdìYe mutèeke Dìná Dyèndè amu, ki mwaba wumwepele wùdìYe ùsambakeena ne mukuukwidi. Ne Dìná Dyèndè dìvwa n’Yesu Kilisto. Dìná dya Nzambi n’Yesu Kilisto.

<sup>37</sup> Yesu wàkamba ne: “Mémè ndi mulwe mu Dìná dya Taatù Wanyì.” Mwànà wa balume yònsò ewu udi ulwa mu dìnà dya tatwèndè. Ne Yèyè wàkalwa mu Dìná dya Taatù.

“Ne kakwèna dîngà Dìná nansha dimwe mwinshi mwa Dyulu dipà bantu to,” nansha bàdibìikila ne m’Méthodiste, Baptiste, Presbytérien, église de Christ, cyònsò cididi difwànyine kwikala aci. Kùdì mwaba wa ditwilanganana anu wumwepele mùdì Nzambi ùtwilangana ne muntu, ne mwine awu mpàdiye mu Yesu Kilisto, mwaba wumwepele. Nenku bintu byònsò bya kale bya mu Dipungila Dikulukulu ebi, bìvwa cifwànyikijilu cya cyòcì aci. Ndi muswe bwa nwènù kucyùmva bitòòke tòò. Mpindyewu, ndileesona dya kalaasa kàà Dyalumingu. Ndi ne Mifùndù ne tuntu tufùnda mwab’ewu. Mvwa mwele meeji ne eci cìvwakù mwa kunwàmbulwisha bwa kumvwa, bu mùdìbi ne bintu byònsò bya kale abi mbyenzeke bu bileejilu kutùdì.

<sup>38</sup> Mpindyewu, tudi tusangana ne Nzambi ùvwa ne mushindu kampana wà dyanza bintu. Kadi Davidì, anu mubènèshìibwe kùdì Nzambi, mùvwàye mubènèshìibwe amu, ne mulwe mfumu, ki kumbà kudyàmbidilayè anu ne ùvwa anu mwa kwenza cintu kampana bwa Nzambi, nansha bya munyì. Kadi kààkacyènzakù mu mushindu mujaalàme to.

<sup>39</sup> Tudi tumona ne, Nzambi ùtu ùbuulula Dìyì Dyèndè mu muvù Wèndè Yèyè mwine mudyànjila kulongolola. Mpindyewu, mmunyì mùvwà Martin Luther mwa kumanya Mukenji wa leelu ewu? Mmunyì mùvwà ba-Presbytériens mwa kumanya? Mmunyì mùvwà Martin...anyì ekeleeziya wa Katolike mwa kumanya mukenji wà Martin Luther? Mmunyì mùvwà John

Wesley mwa kwikala muumanye mukenji wà Luther? Mmunyi mùvwà Wesley mwa kwikala mumanye mukenji wà beena Mpenta? Anyi mmunyi mùvwà beena Mpenta mwa kumanya Mukenji ewu? Nwamonu anyi? Yèyè ùdi ùWùbuulula mu mivù Yèndè, bwalu Wùdi n'Dimiinu. Nenku pàdiCi cikola ne ciboba, Yèyè ùDìbuulula.

<sup>40</sup> Bu mùdi luuya lwa dîbà dya muulu, bwa kukangula. Pàdi dimiinu ditekète ne dyànà, lùdi lùdìpàtula mu buloba, dimiinu adi; pashiishe lùdìpèèsha mabeji ààdi, mu citùpà cikwabo cya dîbà dya muulu. Dîbà dya muulu dya luuya lukole dîdi mwa kudishebèya piikalàdi dimiinu dya diboba. . . anyi cikondo cya diboba. Pa nanku, Yèyè ùdi ùkòntonona dîba dya mulu ne ùkòntonona bufùki, bwa kukumbanganabi ne Dìyì Dyèndè.

Yèyè ùdi ùkòntonona Ekeleeziya, badyànjila-kulongolola abu, Mukaji-musela, bwa kukùmbanganabò ne movù wùdìbo ne mwoyi awu.

<sup>41</sup> Nansha bufùki bwine's bùdi bùtwàmbila leelu ewu, patùdi tumona matunga àpanduluka apa, buloba bùtùkina ne, mufundu wùdi ku cimanu. Tudi tumona ekeleeziya ne ngiikàdilù yidiye ùsanganyibwamù.

Tudi tumona Mukaji-musela ne ngiikàdilù udiYè ùsanganyibwamù. Ne tudi tumanya, tumanyina ku bufùki ne, Ekeleeziya ùdi munkaci mwa kudilongolola bwa kuumuka. Cikondo kaayi cya butumbi's wè! Ncikondo civwà baprofeta bònsò bajingèjinge kumona, dîbà edi.

<sup>42</sup> Mpindyewu, Yèyè ùdi ùbuulula Dìyì Dyèndè anu mu movù wàDì. Martin Luther ùvwa ùbala Bible umwèumwè utùdi twètù babalè ewu. Wesley ùvwa ùbala Bible umwèumwè uvwa Martin Luther mubale awu. Beena Mpenda bàvwa bàbala Bible umwèumwè utùdi twètù tubala ewu. Yesu ùvwa ùbala Bible umwèumwè uvwa Bàfaalèsà bàbala awu, kadi bôbò bàvwa ne. . . Bàvwa bàteeta bwa kulama blé mu citùpà cya ntwadijilu, pèndè munkaci mwa kuboba, bàpanga kumona dyabo dîbà.

Mpindyewu Davìdi mmwenze cintu cimwecimwe aci mwaba ewu.

<sup>43</sup> Nzambi ùdi ùbuulula Dìyì edi mu movù, ne ùbuulwila ewu udiYè ùsungula bwa kuDìbuulwila awu. Nzambi ngudi usungula ewu udiYè ùDìbuulwila. Yèyè wàkasungula aci kumpala kwa difùkà dya dyulu ne buloba. Byenzedi Byèndè byònsò bikaavwa bidyànjila kumanya kùdiYe, bisokoka muntu. Yèyè ùdi ùbìbuulula mùdiYe Yèyè muswe. Mmovù Wèndè musungula, muntu Wèndè musungula. Ne Yèyè kacya kàtukù mwanji kusungula kasumbù kàà bantu anyi kasumbù kàà ntendeleelu to; mmuntu musungula, ki mushindu wùdiYe ùcyènza.

<sup>44</sup> Nganyi wàpeta dikàmakàmà dya kuMulongolola, ne kwamba ne: "Mpindyewu, Mukalenge, Udi mutupakane pa kutèeka ewu muntu mu mudimu wà bwambi. Ewu

muntu kèna wítabuuja mutùdi twètù twitabuuja to”? Nganyì wàmabila Nzambi ne mMutupakane mu cyòci aci? Mbifwànyine kukèngela muntu wa mumpicìlekù mèmè ewu ku dipanga, bwa kuMwambilaye nanku. Yèyè’s mmumanye cidiYe wènza. Yèyè mmumanye wa kusungula ne wa kubenga kusungula, cya dyenza ne dibà dya kucyenza. Nansha twètù twela meeji bishi ne muntu kampanda ngudi mukùmbànyine bwa kwenza mudimu kampanda, Nzambi Yèyè ngudi mumanye ne nganyì udi mukùmbànyine bwa cikondo aci ne muvù awu, anyì cikondo ne diba dikùmbàne bwa kucyènza.

<sup>45</sup> Nenku mwena Kilisto wa cya bushuwa, mulelela; mwena kwitabuuja wa cya bushuwa, mulelela mu Nzambi, ùdi wìndila Mukalenge bwa kwenza bintu ebi. Ikàlà windila mudimu wèbe wà bwambi. Wèwè muumvwe dibìikila, ikàlà mutwishìibwe ne n’Nzambi. Ikàlà mutwishìibwe ne dibìikila adi ndya cya bushuwa. Ikàlà mutwishìibwe ne didi pa dibà bwa cyùdi wamba aci. Bible mmwambe ne: “Aba bàdi bìndilà Mukalenge nebàvwijululè makànda àbò mapyamàpyà. Nebàbande muulu ne mapwapwa bu mukanku. Nebànyemè lubilu kabàyi bàcyòka. Bòbò bendè lwà makàsà, kabàakupangila to.”

<sup>46</sup> Monaayi Davidi, mfumu wa Izaleela, ucìvwa ufùminakù ku dyediibwa dya maanyi awu. Samwèlè ngwàkamupòngolwela maanyi, ne yèyè ùvwa musungula kùdi Nzambi, bwa kwikalaye mfumu wa Izaleela. Nenku Davidi kupetaye dibuulula edi, bwa kufikisha mushèètè wà cipungidi wà Mukalenge mu nsesa ya Davidi. Mpindyewu, kakwèna cintu cibi nansha cimwe to, kadi, nudi numona’s, Davidi wàkacyènza mu mushindu mubi.

<sup>47</sup> Mpindyewu, bìdi bìmwèka bu ne bu muntu wa mushindu awu mwa kupeta dibuulula, muntu munene mùdi mfumu musungula wa Nzambi, mfumu mutàmbe bunene ukààdikù ne mwoyi pa buloba, pa kuumusha Kilisto, ngeela meeji ne, ùvwa n’Davidi, bwalu Kilisto m’Mwànà wa Davidi. Mpindyewu, muntu wa mutàmbe bunene awu, ùcifùminakù ku dyediibwa dya maanyi, ùfùmina mu Bwikadi mene bwa Nzambi, wàkapeta dibuulula bwa kwenzaye cintu kampanda bwa Nzambi, ne muswe bwa kucyènza bwa Nzambi; kadi dibuulula adi diikàle dya mashimi. Mpindyewu, aci’s ncintu cinène. Necipetanganè ne cyena-bwalu cyetu eci ne: *Kuteeta Kwenzela Nzambi Mudimu Kùyi Mubùkìdìbwe Bwà Kuwènza.*

<sup>48</sup> Monaayi ne, Davidi ngwàkapeta dibuulula adi. Ne monaayi ne, kàvwa mmuprofeta, Natànaèlà, wàkapeta dibuulula adi to. Ùvwa n’Davidi, mfumu, wàkapeta dibuulula adi. Nansha Natànaèlà kàakakonkiibwakù bwa bwalu abu to. Yèyè kàakakonkakù Natànaèlà to. Kadi nukààvwakù bamòne kaaba aka, mu Kulondolola wa Kumpala emu ne, yèyè wàkakonka baakàpìteenà bàà binunu, ne baakàpìteenà bàà nkama anyi? Yèyè kàakakonkakù Natànaèlà to. Wàkakonka bantu, ne wàkakonka kabidi bàakwidi ne beena tèlòlòjì bàà mu dituku

adi, bafùndi ne beena teòlòjì. Davidi wàkakonka dyambedi, wàmba ne: “Byôbì ne, cyôci eci, piikalàci cya kùdì Nzambi, tùyaayi tùkangàtè mushèètè wà cipungidi wà Nzambi wetu tulwe naawu, mu nsesa emu, nenku twikalàayi tukonka Nzambi kumpala kwa twètù kwenza maalu.”

<sup>49</sup> Kadi bàtu bambe, bwa mu matuku a Shawùlà ne: “Bààkiimanyika kukonka Nzambi, ku—ku—ku mushèètè wà cipungidi, Ulimà, Ulima Tuumimà. Bààkiimanyika kwenza nanku.”

Davidi kwambaye ne: “Mpindyewu twàlukilàayi kùdì Nzambi, twètù bônso! Twàlukilàayi ku cintu cijaalàme. Tùyaayi tùkangàtè mushèètè wa cipungidi tulwe naawu muneemu, tұлwayi ne Bwikadi bwa Nzambi,” mu ngaakwilu mukwabo’s, “mu nsesa emu. Twènzàayi ditàbuluja. Twàlujàayi bantu.” Kadi yèyè wàkapeta dibuulula, òwà dimwèke ne ndîmpè, kadi kacivwa diswa dya Nzambi to.

<sup>50</sup> Pamutu pàà kukonka mushimi wùvwàbì bikèngela bwa kwikalaye mukonke, yèyè kukonka baakàpíteenà bèndè, bwalu ùcivwa ùfùminakù ku diikala mfumu. Ki kulondaye ngeelèlù wa meeji awu, wa ne, baakàpíteenà bèndè banène ne bantu bèndè banene abu.

<sup>51</sup> Pashìshe kubwelaye mu ekeleeziya wa kù dîna awu ne kukonkaye ní bàvwakù mwa kwenza ditàbuluja. Baakwidi, bafùndi, baakàpíteenà bàà binunu, baakàpíteenà bàà nkama, ki kubàkonkaye. “Bwalu ebu ndiswa dya Mukalenge anyi?” Ki bôbò kwamba ne ndyôdì. Kadi, nudi numona’s, wàkapanga kukonka nsùlù munene ùtu Nzambi misangu yonso ùkwata nendè mudimu awu. Nwamonu’s, wàkapanga kucipeta.

<sup>52</sup> Kadi meeji ènde àvwa mîmpè. Kabingilà kèndè kàvwa kîmpè. Kiipàcìlà kèndè kàvwa kîmpè, kàà kutwala ditàbuluja mu nsesa, kwaluja bantu kùdì Nzambi aku, kadi kààkakkonkaku mushindu wùvwà Nzambi mumwambile bwa kucyèenza to, nwamonu’s, nansha bantu bônso mene bààkiitaba, ne baakwidi bwa ne mfumu ùvwa mubinge: Bàvwa ne dijinga dya mushèètè wa cipungidi kwalukilawu mu nsesa; mpindyewu, bàvwa dijinga ne Bwikadi bwa Nzambi; bàvwa dijinga ne ditàbuluja.

<sup>53</sup> Kadi Nzambi kàvwakù mulaye bwa kubuulula Dìyì Dyèndè, mu movù wàDì, kùdì bantu to. Kacya Yèyè kàvwakù mulaye bwa kuDìbuulwila mfumu, mu movù to. Nzambi kàtu ùshintuluka to, nansha kakese. Kàvwa mulaye bwa kwenza nanku to.

<sup>54</sup> Nansha wèwè ne meeji matòòke a bishi, ne tubingilà twîmpè twa bishi, ne twipàcìlà twîmpè twa bishi, ne mushindu wùdì bantu baswe bintu abi ne bapetè dijinga dyàbì, kùdì diswa dya Nzambi dîdì dikèngela kukumbaja mu byôbì bintu ebi. Ki cîndì muswe kutuutapù musonso bikole, bwalu ndi muswe kuvwija cyôci eci mu mushindu wa bikèngela wèwè kucimòna piikalàbì ne—piikalàbì ne Nyuma wa Nzambi mmusòmbèle munda mwebe

amu. Ne ki bwa cinyi ndi njàngulukila ntàntà mule kaaba aka. Kì mbwà kunwàngata díbà dyenu nwènù bàdi bàtèèlejila ku telefone, ne ku nshinga abu to, kadi ndi—ndi muswe nùcyũmvwè. Díbà dyúdi mufucile dyôdi dijìkè, díbà adi angàta mukaba wà mèyi. Bwa ne kudi . . .

<sup>55</sup> Nansha byòbì ne bàdi naaci dijinga dyàbùngì, nansha mùdi bantu bònso bìitaba ne bàdi naaci dijinga, nansha mùdici Bulelela, nansha nanku kùdi cintu cimwe cya kujandula. Ndiswa dya Nzambi anyi?

Mpindyewu, kacypù Nzambi kàvwakù mulaye ne Neàbuulwile bamfumu Bèndè maalù Èndè masokome, ne Neàbuulwilè bantu Bèndè maalù Èndè masokòme to.

<sup>56</sup> Cintu cyenzè bu cya mu cikondo cya Miikà, mwànà wa Imlah. Patùdi tushìya, kì ntushìya dyumvwija to, kadi ncikondo cikwabo, bwa kutwala cyòci eci ne kunùvwijilaci cilelela, cya dya bushuwa kunùdi, bwa kacìikadi cyàlwa kunùpita to.

<sup>57</sup> Kùvwa, mu matuku a Miikà . . . Yèyè ùvwa mupele, ne kabidi mupàtùkile mu dikù dya bapele. Kadi, Aakàbà, mfumu wa Izaleela, bu ditunga mu bukookeshi bwa Nzambi, ùvwa mutèeke cilongelu ku luseke ne mujuule baprofeta basòbola ku cyanza cyèndè, badìsungwila, ne ùvwa naabo nkama yinaayi mijimà mu cilongelu kampanda. Ne bóbò abu bàvwa bantu banene. Kabàvwa baprofeta bàà mashimi to. Bàvwa baprofeta bàà beena Ebèlù, bantu bashùwashùwàlè. Ne bàvwa bàkonkela Nzambi maalù ku bóbò bantu abu. Ne cya bushuwa bóbò bàvwa bàmba biprofeta. Kadi, nudi numona's, pààkalwà diteetangana dya makàndà dya cya bushuwa, bàvwa muntu ne muntu pambelu pàà Dìyi ne diswa dya Nzambi. [Katùpà kàà mukaba wà mèyi munda mutupù—Muf.]

<sup>58</sup> Bwalu Yehoshàfàtà wàkafùma ku Yèlùsàlèmà bwa kutwilangana ne—ne mfumu Aakàbà, ki kuvwàlabò bivwàlù byabo, ne kusòmbabò mu mushiku wà mbelu wa ciibi, ne kubìikidishabò baprofeta abu kumpala kwabo aku. Dyambedi, Aakàbà kwambaye ne: “Tudi ne mwaba mu Laamòta-giilàdà emu udi cya bushuwa wètù twètù.” Mpindyewu, aci ng'EMU MMÙDÌ MUKALENGE WÀMBA. Yoshùwà ngwàkaabanyina bantu buloba abu ne kubàpèeshayèbu, kadi beena Pelèshètè kubùnyèngabò.

Ki yèyè ne: “Mwab'ewu bàrà beetu twètù balela bàkèngela byakudya, kadi twètù katùyì ne buloba bukùmbàne bwa kukùnàmù byakudya to. Kadi mwena lukunà wètù, beena Pelèshètè abu, mbàdi bàdiisha bààbò bàrà balela, bampàngaanù abu, ne bya mu buloba bwine bùdi Yehowah Nzambi mutùpèeshe abu.” Aci's ncyà buludi menemene. Ki yèyè ne: “Mona, twètù aba, cisàmbà cya Nzambi, basòmbè mwaba ewu ne beetu bàrà, mu lukengelu's, pàdi beena lukunà beetu bàdiisha bààbò bàrà mu buloba bùvwà Nzambi mutùpàtwile mu Èjiipitù

bwa kutùpèèshabù abu.” Aci’s ncifwànyine kubindulula mwena téòlòjì, kí mmwómò anyi? Yèyè ne: “Netùye bwa kangata malaba àdì Nzambi mutùpèèshè awu anyi?”

<sup>59</sup> Yèhoshàfàtà kwambaye ne: “Eyowa’s, mèmè nènkwambulwìshè. Twètù’s tudi bânà bàà muntu. Wèwè udi mu Yudaàya, ne mèmè ndi mu—mèmè ndi mu Yelusàlèma.” Anyi—anyi, civwa ncyanza mwandamuna anyi? Ngeela meeji. . . To, ncyà bushuwa. Ngeela meeji ne cidi. . . Yèhoshàfàtà’s.

Nansha nanku, Yèhoshàfàtà ùvwa muntu mwìmpè, mfumu, muntu mwakane uvwa munange Mukalenge. Aakàbà ùvwa mwena kwitabuuja wa civùmvù. Kì kubàbìikidishabò mwaba awu, nenku Yèhoshàfàtà kwambaye ne: “Tèèlèjà, twànji tükonkèbi Mukalenge dyambedi. S’bìvwa bikèngela bwa twètù kwanji kujandula pa bwalu ebu.” Nwamonu’s, Davidi wikalapù nanshà mwenze cyàkenzà Yèhoshàfàtà aci’s! Yèyè ne: “Kabìvwakù bikèngela bwa twètù kwenza nanku anyi?”

Ne lukasa lwònsò, bu mùvwàye mwena Izaleela, Aakàbà kwambaye ne: “Cya bushuwa’s. Ndi ne nkama yinaayi mijimà ya beena Ebèlù, bu twètù, baprofeta beena Ebèlù bàà mu bulongolodi bwetu sungasunga. Nenku nèmbàkonkè bóbò. Mbaprofeta.” Mpindyewu, nudi numona’s, anu. . .

<sup>60</sup> Wèwè udi wamba ne: “Aci’s cidi cìdendwisha mèmè’s, Mwaneetu Branham. Muprofeta?” Kaa, eyowa’s. Kùvwakù mukwabo mu cikondo cya Yelèmiyà, wákamba ne bàvwa mwa kwenza muntwamu anu bidimi bibidi cyaànà. Mukalenge ùvwa mwambile Yelèmiyà ne, “makumi mwandamutekete.” Kudyèlayè cikòkedi ku nshingu, ne muprofeta awu kucìkòsayè, Hànaaniyà. Kadi’s nudi bamanyè cyàkamwenzekelà. Kaa, eyowa’s. Bikèngela wèwè kushàala ne Dìyi.

Pa nanku baprofeta aba kulwabo mwaba awu ne kwambabo ciprofeta, bàmba ne: “Ndà! Mukalenge ùdi neebe.”

<sup>61</sup> Ne umwe wa kùdìbo, ngeela meeji (dìnà dyèndè nyewu dyàmpù mwoyi mpindyewu) mfùmwbò awu, Zedèkiyà, ngeela meeji, kwambaye, kutèekaye nsengu ya byamu yibidi mwaba awu ne kwambaye ne: “EMU MMÜDÌ MUKALENGE WÀMBA. Ku yòyi eyi,” mpindyewu muntu awu’s ùvwa ne meeji matòòke, “neùsakè mwena lukunà wèbè awu too ne mu malaba àbò, ne wèwè newàngatè cìdì cya Nzambi aci. Ncikupèèbwe.” Ncyèna ngeela meeji ne yèyè ùvwa mwena lubombo to. Ndi ngiitabuuja ne yèyè ùvwa muntu mwìmpè: Ndi ngiitabuuja ne baprofeta bònsò abu ncivwbò.

<sup>62</sup> Wèwè udi wamba ne: “Baprofeta?” Eyowa’s! Vùlukàayi ne, muntu mwine wàkiitaba bwa kushebeya Yesu Kilisto awu, yèyè’s wákamba ciprofeta, bwalu civwa mmudimu wùvwàye naawu. Yèyè ùvwa mwakwidi munene cidimu aci. Nenku bu mùvwàbi ne yèyè ùvwa ne mudimu awu, ne yèyè nguvwa mu mudimu awu, Nyuma wa Nzambi’s wàkalwa kùdiye. Aci kacìvwa cyùmvwija



ne yêyè ùwwa musùngidìbwe anyì nî ncinyi pa bwalu abu to. Nenku yêyè wàkamba ciprofeta: Kaayifà awu, bwalu mudimu wèndè awu ngwàkenzà aci.

<sup>63</sup> Nenku baprofeta aba, bu mùvwàbo baprofeta, ne mudimu wà buprofeta, s'jàakamba ciprofeta. Nenku Nyuma wa Nzambi wàkalwa pambidi pààbò, bantu biikàle ne mapà a Nyuma.

<sup>64</sup> Ndi mumanye ne bya pa lukama makumi citeema ne citeema bya bàndì munkaci mwa kwakula naabo mbeena Mpenta. Kadi bantu misangu yàbùngì, muntu, Nzambi ùdi mwa kukwata nendè mudimu, kumupèèsha dipà kampanda, kadi bantu nebàbangè kucincimika bantu abu. Yêyè kàyi menemene mubiikidìbwe ne mutùmìbwe kùdi Nzambi to, yêyè's neàfikishè mulume awu anyì mukaji awu ku dyamba dya cintu cidi kacìyi diswa dya Nzambi, bwalu bantu bàdi bàmwenzeja bwa kucyènzayè.

<sup>65</sup> Mushindu mwine wàkakèngelàbi bwa mèmè kulongololakù mpaasàtà wetu mukese ewu pa bwalu abu. Mu diitu mwàmwa mu dinda kampanda, bu pa dîbà isatu wa mu dinda nanku awu, kwambaYe ne: “Ndà kambile Mwaneetu Neville!” Mèmè kulwa kùdi, ki mmwòmò anyì, Mwaneetu Neville?

<sup>66</sup> Ki bantu bônso abu ne: “Mwaneetu Neville, ngenzèlèku ciprofeta. Ngambilèku *cikampanda* anyì *cikansanga*.” Nwamonu anyi? Nudi dîbà adi numufikisha ku dyamba bintu bìdi bifwànyine kubenga kwenzeka.

“Aba bàdi bìndilà,” bwa kujandula cidi Mukalenge muswe kwenza's. Nwamonu anyi?

<sup>67</sup> Pa nanku bantu aba bàakatàngila bwalu abu mu luseke lwà mubidi ne: “Buloba abu mbwetu twètù.” Kadi, nudi numona's, bôbò kabààkapeta Dîyi ne diswa dya Nzambi to.

<sup>68</sup> Pashìishe ki Miikà kudyataye mwaba awu, kadi ùwwa yêyè ne cikeena-kumona. Yêyè wàkanji kukenketa, dyambedi, nudi numona's. Kwambaye ne: “Indilaaayi. Mpèèshaayi bufuku bumwepele. Ngánjì njandule, ne pàmwápa màalabà ndi mwa kunwàndamuna.” Kávwa yêyè muye lukasalukasa ne: “EMU MMÜDÌ MUKALENGÈ WÀMBA” to, bu mùdi, kwitabangana ne baprofeta bakwabo abu. Yêyè wàkamba ne: “Mèmè nèngàmbè anu cidi Nzambi wàmba aci.”

Nenku pàkacyàbu, tudi tusangana ne, Nzambi wàkamwambila cívwa ne cya kwenzeka. Ne kakùyì mpatà to cívwa cibèngangana ne cya bakwabo abu. Cìlongelu cijimà, cívwa cibèngàngàne. Ne umwe wa kùdìbo mene wàkalwa tàmakàtàmakà ne kumunàngulayè dipi mwísù, bwa cyôci aci. Kadi, nwamonu's, yêyè wàkindila. Dîbà adi pààkenzàye nanku, wàkapàlakaja ciprofeta cyèndè aci, cikeena-kumoana cyèndè aci, ne Dîyi difùnda, ne cívwa cikùmànàngàne anu ne Dîyi.

<sup>69</sup> Pàdi muntu wàmba mùdiye “mupete diibuulula dya kubàtiiza bantu mu Dìna dya ‘Taatu, Mwànà, Nyuma Mwimpè,” aci’s cidi cìbèngàngana ne Dìyì. Muntu nansha umwe wa ku bakwabo bònso abu kàakacyènzakù to. Pàdìbo bàmba, ne: “Kaa, netwimanè, ne *bikampanda*, *bikansanga*, ne *bikankenga*,” ne bikwabo byònsò, abi’s mbibèngàngàne ne Dìyì. Pàdìbo bàmba mùdìbo “kabàyi bìitabuuja dimiinu dya nyoka,” aci’s ncibèngàngàne ne Dìyì. Bintu bikwabo byònsò ebi, s’mbibèngàngàne ne Dìyì. Bidi ne cya kwikala pamwe ne Dìyì ne mu movù.

<sup>70</sup> Mpindyewu, Davidi wikalakù nanshà mwenze ciine aci’s. Mushèètè wà cipungidi wùvwa wùlwa, kadi kî mpa dîbà adi to; kakùvwakù mwaba bwàwù wòwò to.

<sup>71</sup> Monaayi mpindyewu pàakayàbo bwa kwangata mushèètè wa cipungidi awu, bantu bònso bàà myânzù mitùmbùke bàakamba ne: “Ki cintu cya dyenza ncyòci aci, Davidi. Butumbi kùdi Nzambi! Bidi bitùkèngela ditàbuluja.” Aci’s cìvwa m’Mpenta wa cya bushuwa ewu, leelu ewu; ba-Baptistes, ba-Presbytériens. “Davidi, wèwè ki wetù mfumu! Nwènu bònso...Kàpíteenà *Kampanda*, ne Major *Kampanda*, ne Kalàlà *Kampanda* kàà masalaayi, nebiikalè mu disangisha dyebe amu. Mona’s, bàdi bàmba ne ki cintu cya dyenza ncyòci aci, Davidi. Ditunga dijimà nditwe ku cyebe.”

Ki lutatu lùdiku leelu ndwòlò alu. Mémè cìndi muswe kî nditunga to. Ndi muswe Nzambi, nansha kakùyi muntu mukwabo udi mwa kwimana naanyi.

<sup>72</sup> Davidi ùvwa ne baakàpíteenà bònso. Ùvwa ne dimwela dya mu diboko dya basalaayi. Ùvwa ne dimwela dya mu diboko dya mangumba ònsò, pamwe ne beena tèlòlòjì bònso, ne bònso, bantu bònso biitabàngàne nendè. Ki mùvwà kabidi Aakàbà, ne bakwabo mu Mifundù, kadi kàvwa ne Nzambi to, bwalu ùvwa mupàtuke mu diswa dya Nzambi. Ndi ntékemena ne tudi tuumvwa eci.

<sup>73</sup> Monaayi, kwenzabo cintu cyònsò cya butendeleedi cìvwàbo bafwànyine kwenza aci. Pàmwàpa bàakafila mamanyisha ne byònsò ne: “Ditàbuluja dinene! Mushèètè wa cipungidi newàlujiibwè. Netwènzè ditàbuluja. Netwènzè *bikampanda*.”

<sup>74</sup> Monaayi, kutumaye bimbi bàà misambu. Kutùmayè bantu biikàle ne nkòmbè, ne mpungi, ne kwenzabo cintu cyònsò cya butendeleedi cìvwàbo pààbò bamanyè mwa kwenza aci; kadi Nzambi kàvwa ànumù to.

Mu mushindu kampanda tudi tucimòna munkaci mwa kwenzeka cyakabidi, kî mmwòmò anyi?

<sup>75</sup> Kwangatabo bimbi bàà misambu bònso. Kwangatabo bimbi bàà nkòmbè, beedi bàà mpandalala; bakaji, balume, ne ewu yònsò uvwa wimba awu. Kuyabo naabo bònso kuntwaku, ne kwenzàbo cyenzedi cyònsò cyà butendeleedi aci.

Ncyèna muswe kwamba eci to, kadi bikèngela anu ncyàmbè. Ki mùdì kabidi mangumba aa leelu ewu, a beena Mpenta ne bônso, bàdi bènza byenzi byônso byà butendeleedi, byà dimba dya misambu ne dyela dya mbila abi.

<sup>76</sup> Monaayi ne, Davidi wàkeela mbila ne bukole bwèndè bwônso, ne wàkeela mbila mikole, ne kutùpika, kwenza dinyungakana dyônso dya butendeleedi òvwà difwányine kwikalakù adi; kadi Nzambi kàvwa ànumù to. Kadi kabingilà kèndè, ne kiipàcilà kèndè, ne byônso bivwa bijaalàme; kadi ùvwa muye naabi mu mushindu mubi. Nwamonu anyi? Wakenza didikùpa dyônso dya butendeleedi adi; kwelaye mbila, kwimbaye misambu, kwangata bimbi bàà misambu bàà pabwàbù, beedi bàà mbila bàà pabwàbò, ne bikwabo byônso. Kujàbo mu nyuma. Kwenzabo byônso bivwa bya butendeleedi abi.

<sup>77</sup> S'ncintu anu mùdì bibilù byetu bya butangadiki bya mu cikondo cyetu eci abi. Mbaswe kupetela Kilisto bantu bàà buloba bujimà. Cintu bu nanku kacitukù to. Matàbuluja manene àdi àbooyà bantu bàà dibooya, bintu binène byènzeka; bu nansha ne bàvwakù mwa kumanya, adi dituku's ndimane kupita. Ditunga ndyediibwe mulawu. Kadi ki kwasabo bitanda eku, bibilù bya butangadiki, malongolodi, ne byônso. Kadi, bipeta's bìdi byàmba kwikala anu mùvwà bya cikondo cya Davidi abi, kacyakakumbana to.

<sup>78</sup> Tudi tuya tukenza ditàbuluja. Banene beetu, bamwe bàà ku batangadiki beetu bàà banene leelu, bàdi bàmba mùdìbo ne bantu binunu makumi asatu bàdìbo bakùdìmwishe mucima, mu mbingu yisambombo; kadi cidimu cimwe pashiishe, dya bàalukila anyi, kabayi mwa kusanganakù makumi asatu etu aa to. Kùdi cintu cidi kaciyi cyènda bimpè to. Bwalu bùdi ne, ncintu anu cimwecimwe ne cyàkenzà Davidi aci. Bantu banene bàà myânzù, bantu banene, bayiishi banene, bilongelu bya bitàmbe bunene, bukookeshi bunene, kadi bàcidi anu bàkonka dingumba dya kale pamutu pàà kutangila Dìyi dya Nzambi mumpala bwa kumona dìbà didi movù mwikàlekù. Kwèna mwa kukùna byakudya kampanda kaciyi mu bikondo kampanda bya cidimu to.

<sup>79</sup> Mpindyewu tùmònààyaaku cyàkenzekà ne ncinyi. Nansha mùvwàbi ne dyabo... Disaluka dyabo dya butendeleedi ne bikwabo bivwa binène, meeji àbò àvwa manene, cibilù cyabo cya butangadiki civwa cinène, ngimbilù wabò wa misambu ùvwa munene, njiilu wabò wa maja ùvwa wa njàjàmà, ngeelèlù wabò wa mbila ùvwa munene, mùjikì wabò wùvwa munene, ne bàvwa ne mushèètè wà cipungidi. Mushèètè wà cipungidi wùdi ne mushinga kaayi kakùyì Nzambi? S'cidi anu cishèètèshèètè cya mabaya cyanààna, ne bipese bibidi bya mabwe.

S'cidi anu bu kwangata kwa kòomunyò, kwikala mubàtìjìbwe. Kubàtìjìbwa kùdi ne mushinga kaayi pawikalà kùyi munyingàlèle dyambedi? Bidi ne mushinga kaayi, bwa kwangata kòomunyò, kulwa mwena lubombo, pawikalà kùyi ne nsòmbelu mwine ne witabuuja bikwabo bya Dìyi dya Nzambi? Kwangata citùpà cyàDi, kadi kùyi wangata bikwabo byàDi, s'bidì bìleeja ne kùdi cintu kampanda cya kaciyi cyènda bìmpè's.

<sup>80</sup> Mpindyewu, pàdi byònsò ebi byènzeka, tùmònààyaaku mpindyewu cidi cyènzekà pàdi Nzambi, ne cikondo Cyèndè ne dībà Dyèndè, kàyikù mwangaciibwe ne mushinga to; kadi anu meeji a bantu pa òwò.

<sup>81</sup> Bantu bààbùngi bàkaadi bangambilàmbìle ne: “Bwa cinyi kwèna ulwakù muneemu bwa kwenza disangisha? Ee, twètù's mbàdi bàkubiikila. Twà cyàlà bwa *cikampanda*, *cikansanga*, ne *cikankenga*.”

Indilaayi! Nudi bafwànyìnè kucijinga, kadi cidi Nzambi wàmba ncinyi pa bwalu abu? Bantu bààbùngi bàkaadi bangambilàmbìle... Nkàadi mupete dibiiikila, nkàadi mupetèpète miyiiki ya babidi, miyiiki ya babidi ya muntu nkàayèndè ne bikwabo, bangidile cidimu cijimà. Indilaayi! Mmunyi mungàamanyà cya kwamba pàdi Nzambi kàyi mungambile cya kwamba? Nwamonu's, bikèngela kwindila! Ki bwa cinyi ngàmbi ne: “Cifùndaayi pa dibeji. Ngánjì mmone cidiYe Yèyè mwambe.” Nwamonu anyi? Indilaayi! “Aba bàdi bìndilà Mukalenge nebàvwijululè makànda àbò mapyamàpyà.” Ncya bushuwa anyi?

<sup>82</sup> Monaayi, bààkakonka anu baakwidi bàà mu dituku adi, beena tèòlòjì, ne mangumba. Kadi monaayi, mu kwenza kwa nanku, kukonka kwa baakwidi ne kukonka kwa disangisha, kukonka kwa bantu, s' bàakacyènza mu mushindu mubi.

<sup>83</sup> Monaayi, mushèètè wà cipungidi awu wùvwa n'Dìyi. Tudi bamanyè ne aci ncyà bushuwa. Bwalu, mushèètè wà cipungidi n'Kilisto, ne Kilisto n'Dìyi. Nwamonu anyi? Mushèètè wà cipungidi, anyi Dìyi, kawàkatèèkiibwa mu mwaba wàwù wà kumpala, mulongolola, wà ku cibangidilu to. Kaa, kanùpangidikù bwa kuumvwa eci to, nwènù ekeleeziya!

Byònsò bìvwa bipwàngàne, ne byònsò bìvwa ne mmwènekèlu anu mwìmpè, bu ditàbuluja dinene òvwa munkaci mwa kulwa; kadi anu bwalu bààkapanga kukonka muntu uvwa ukèngediibwa bwa bwalu abu! Bòbò bààkakonka baakwidi, bààkakonka bantu banene bàà myànzù, bààkakonka beena tèòlòjì, bààkakonka bimbi bà misambu, ne dìyi dimwe bààkasangisha bintu byònsò pamwe, ne bulongolodi bunene bwa basalaayi, kabidi ne—ne—ne makole a ditunga. Byònsò bìvwa binwàngàne bwa disangisha dinene, kadi bàkapanga kukonka Nzambi. Ki cyàkenzà kabidi Aakàbà, ki cyàkenza kabidi bakwabo. Cikondo kaayipu's we!

<sup>84</sup> Mpindyewu eci kacinùpicikù to. Bàakapangila kucipeta, bwalu kabàvwa bakonke to. Ne pa kwenza kwa nanku... Tàngilàayi. Pa kuya kùdì baakwidi, pa kuya kùdì beena tèòlòjì, ne pa kuya kùdì beena makole a basalaayi, ne kubenga kwangatakù ne mushinga musanjeela wabò wa cikondo aci mutùma kùdì Nzambi, Natàna, bàakacyènza bibi. Bàakaya ne bàakambula mushèètè wà cipungidi awu ne kuwùtèèkabò mu ditemu dipyadipyà, kuwùtèèka mu ditemu dipyadipyà, anyì ne, “dingumba dipyadipyà nedibangè,” kadi kabìyi pa mushindu mufila kùdì Nzambi, mulongolola bwa kuwàmbwilamù to. Bivwa bikèngela bwa kwambwibwawù pa makaaya a beena Lewi. Kadi, nudi numona’s, paùdì ubanga bibi, neùtungunukè anu ne kuya bibi.

<sup>85</sup> Dizajì dyòdì ne cya kwikala diludikila mu cintu cya diludikila, kadi wèwè kusàka ku luseke lubungu lwà cingoma mu ntàntà wa millimètre ne apa, anu ku ntwadijilu aku, mu ntàntà wa mètres makumi citeema udi ku luseke ne centimètres dikumi anyì dikumi ne yisatu. Udi mubange bibi.

<sup>86</sup> Éyi Nzambi wa yààyà, watùkwàcishakù’s bwa kumanya ne cintu eci ncibange bibi, bibilù binènè bya butangadiki bya díbà edi ebi, mùdìbo bàbìbìkila. Nzambi kí ngudìbò bàkonka pa bwalu abu to. Baakwidi ne batendeleedi ki bàdìbo bóbò bàkonka. Malongolodi ngàdìbo bàkonka. “Ee, nudikù baswe kwikala ne *cikampanda* anyì? Mémè ndi ngeela meeji ne, bu ne tuvwakù mwa kusanga bantu bônso pamwe!” Kanùsangi bantu bônso pamwe to. Petàayi anu Dìyi dya Nzambi pa bwalu abu.

<sup>87</sup> Pashiishe tudi tusangana ne, pàdìbo bènza nanku, cidìbo bènza ncinyi? Mbatùngùnùke anu ne kuya buludi ne ndongamu wabò umwèumwè wa butendeleedi wa kale awu, udi pambelu pàà Dìyi dya Nzambi ne diswa dya Nzambi awu. Cintu aci’s cyàkafwà, kùkaadi bidimu, bintu bikùlàkàjì bikaadi byùme bya kùkaadi bidimu abi.

<sup>88</sup> Cikaavwa cyùme mu matuku a Mukalenge Yesu. Kabàvwa bamanyè to. Wàkamba ne: “Bu ne nuvwa bamanyè Mòsà, nunku nudi baMmanyè Mémè, bwalu Mòsà ngwàkamba ne Mémè mvwa ne cya kulwa.”

Bóbò ne: “Baataatù beetu bàakadyà manà mu cipeela.”

<sup>89</sup> Yèyè ne: “Bônso’s mbafwe!” “Bampofo,” mwàkabàbìkìlìlìYe, Bàfaalèsà, balombodi bàà ntendeleelu abu. “Nwènù kanùyì biitabùùje ne Mémè ki Yèyè awu to, nenùfwe mu mpekaatu yenu.” Kadi kabààkiitabuuja to. Bàvwa batàmbe kujaama mu mishindu yabo bóbò. Bìvwa bìkèngela bwa kwikalabo naaci mu wàbò mushindu.

<sup>90</sup> Ki mwàkacyènza Davìdì. Wàkacipeta mu wèndè mushindu, ki kwambaye anu ne: “Nudi bamanyè cingènza anyì? Tudi tutentemuka.” Úvwa ne dibuulula. “Tudi tutentemuka mpindyewu, pa nanku netwènzè mushindu mupyamùpyà.

Matuku a bishima àkaadi mamane kupita, pa nanku netùdyènzè anu bulongolodi bupyabùpyà. Netwènzè ditempu dipyadìpyà, tuleeja ne cintu cipyacìpyà cyàbangì.” Ciprofeta cya mashimi kaayi’s wè!

<sup>91</sup> Bikèngela nwalukile mu mushindu wùdì Nzambi mwambe bwa kucyènza. Bàvwa bàwùtèèka pa makaaya a beena Lewì, ne pòpò apu nkumutu kwa mwoyi. Mushèètè wà cipungidi, Dìyì, kì ndya kwambwila mu dingumba dipyadìpyà, pa malongesha makwàtakaja a muntu kampanda to, kadi mmu mwoyi. Dìyì dya Nzambi kadyena ne cya kulengiibwa kùdì mangumba nansha; bidi bikèngela bwa kulengiibwaDi kùdì mwoyi wà muntu, mùdì Nzambi mwa kulwa ne kuDìbuulula Yèyè mwine. Nenku yèyè ùcìbuulula bilondèshìle Dìyì, aci n’Nzambi; kabìyi nanku to, kì n’Yèyè to.

Ne, pashiishe, Dìyì dya movù awu! Bushuwa, Mùfaalèsà mmufwànyìne kwamba ne: “Udi mutwàmbìle ne katwena mwa kwenza *cikampanda* ne *cikansanga* ki nganyì pèndè’s? Mòsà’s ngwàkatùpèesha mèyì matùma aa.”

“Kadi’s Mòsà wàkamba kabidi ne . . .”

Sàtaanà kwambaye ne: “Mona’s, bààkafùnda ne: ‘Neàtuminè Banjelo Bèndè dý- . . .’”

<sup>92</sup> “Kadi’s bààkafùnda kabidi,” mwàkambà Yesu.

Muvù, dìbà! “Bu ne nuvwa bamanyè Mòsà! Nudi ne umwe wanùfùnda, m’Mòsà. Bu ne nuvwa bamanyè Mòsà, nunku nudi baMmanyè Mèmè,” mwàkambàYe, “bwalu Mòsà wàkafùnda Bwànyì Mèmè. ‘Mukalenge Nzambi wenù neàjuulè Muprofeta munkaci mwenu, munkaci mwa bàna beenu; Yèyè ki watèèlejabò.” Bu ne bàvwa bamanyè Mòsà, nunku mbaMumanyè Yèyè.

<sup>93</sup> Mpindyewu tèèlejàayi, ne ntema, mpindyewu eci kacìnùpìcìkù to. Nwamonu’s, cintu cya kumpala, pààkakonkàbò baakwidi, kukonkabo bantu banene bàà myànzù, kukonkabo basalaayi, kukonkabo disangisha dijimà, beena mutumba, bwa kudisangabò pamwe bwa disangisha dinene divwà dilwa adi, bààkapanga kucyènza mu mushindu mujaalàme. Kabààkakonka Nzambi to. Nenku, pa kwenza kwa nanku, pa kubenga kwalukila bwa kumona civwà dìbà!

<sup>94</sup> Kaa, mwaneetu, tèèlejà. Ndìbà kaayi ditùdì ne mwoyi edi? Ncikondo kaayi? Mmu dìbà kaayi mutùdì emu? Kì ndìbà bwa maalu àdìbò bàmba aa nansha. Abi bikaadi bimane kupita. Cilumbulwidi cìkaadi pabwìpì mpindyewu. Nudi mwa kucimòna cibwayika. Nudi bavùlùke dibwe dya pa mukuna adi anyi? Dìbà dya cilumbulwidi! Nudi bavùlùke dībuulula, anyi cìkeena-kumona cya Mukaji-musela aci anyi? NùMulamàayi anu mu dikàsà. KanùMulekèdì ùpàtuka mu dikàsà to.

Monaayi: “Pa makaaya a baakwidi!”

95 Kadi Davidi ne baakwidi bõnsò, bõbò bàvwà bulelela ne cya kwikala bamanyè civwà cimpè abu, kadi bwalu bùvwa cinyi? Baakwidi's bàvwa ne cya kwikala bamanyè civwa cimpè. Bafundi, beena tèòlòjì, s'bvwa bikèngela kwikalabò bamanyè civwà cimpè, bwalu Dìyi divwa dyambe bwa kabènji nanku to.

96 Kadi leelu pàdìbo bàswa kwamba ne: “Kaa, Yesu Kilisto kèna umwèumwè awu makeelela, leelu, too ne kashidi to. Aci ndubùkù. Aci *ncikampanda*, *cikansanga*, anyi *cikankenga*.” Badi bàpanga kumona Dìyi dilaya. “Kaa, aci's civwa ndituku dishàale.”

Davidi kwambaye ne: “Kaa, ee, mpindyewu anjì indilaayi kakese. ‘Pa makaaya a—a baakwidi,’ aci civwa cya pààkapàtukà Mòsà apu. Cya bushuwa, twètù kaayi, netùwùtèèkè mu ditempu dipyadipyà leelu ewu. Ndi mupete dibuulula pa bwalu abu.”

97 Baakwidi kwambabo ne: “Amen, Davidi!” Nwamonu's, bapetè bwenzeji bwa kùdi nsangilu wabò mupyamùpyà wa bukwàntèndeleele awu, bwa ne bvwa bikèngela kudisanga ne kwenzabo mushindu *kampanda* ne mushindu *kansanga*, ki cyàkafikishà baakwidi ku dilènduka. Kabààkakonkakù muntu uvwa ukèngediibwa awu to. Kabààkacyènza mu mushindu mujaalàme to, ki bwa cinyi bààkapeta lutatu. Eyowa.

98 Mèmè ndi ncìina ne, mu bintu bùngì cyanààna leelu ewu. . . Mulongeshi munene, umwe wa ku bàà batàmbe bunene bàà beena Mpenta, pààkiimanàye kumpala kwa kasumbù kàà batendeledi aku dilòlò adi mu Chicago, mèmè nguvwa ne cya kwenza dyòdì disangisha adi ne Beena Kantu-ku-byanza, kadi mèmè kwela meeji ne mvwa mufwànyine kwikala mu Afrike ciine cikondo aci, kadi ncìcivwa mfùminakù ku dyalukila dituku dya kumpala kwa kubangadi, ki bõbò kusungula mwena Mpenta munene wa mamanya a mu mutu, ne yèyè kubànda ne kubàmbilayè ne nkwa wa bukwàntèndeleele ewu uvwa ncintu cya Nzambi, ne kwambaye ne bõnsò bàvwa mwa kwalukila, nansha mene ekeleeziya wa Katolike neàpinganè ku ngiikàdilù wendè wa ku cibangidilù, bõnsò bààkula mu myakulu bu cileeki, ne bikwabo, kadi kàyi mumanye ne mbuteyi bwa dyabulu to!

99 Kadi muntu uvwa, ncìvwa mumanyè to, mîngà misangu udi ukùna mamiinu, kwèna mumanyè cìikalà mwa kwenzeka to, kadi mfumu wa Beena Kantu-ku-byanza bàà Evanjeeliyo mu Kaabujimà, anu dya mwakudi munene awu usòmba, kwambaye ne: “Ncìtu ne meeji matùma ku dyamba dya bintu bibèngangana ne baakudi beetu to, kadi awu kî mmushindu wùvwa Mwaneetu Branham mwambe ne nebyènzekè to. Kadi yèyè mmwambe ne aci necilombolè too ne ku cimanyinu cya nyama wa lwonji.”

Yèyè ne: “Kadi Mwaneetu Branham kî mmumanye cidiye wàmba aci to.”

Yèyè ne: “Twètù tudi...twitabuuja ne mmumanye.” Nwamonu anyi?

<sup>100</sup> Kadi mu Chicago, ngâkamba ne: “Mbanganyì kaaba aka bàdi baswè bwa mèmè kufila wanyì ngumvwijilu wa cyôci aci?” Kubangabo kutuuta mikòbolo ne kwela mbila.

Nwamonu’s, udi ukùna mamiinu; kwèna mumanyè cìikalà mwa kwenzeka to. Tungunuka wèwè anu ne kwela Dimiinu. Pààfikà dîbà adi, bamwe bàà kùdîbo bàdi . . .

<sup>101</sup> Bu Toomààsè, yèyè ki uvwa bu wa ndekeelu nanku bwa kumona Mukalenge. Kadi, byàkakèngela bwa kuMumona, bwa kuMwitabuujaye. Nwamonu’s, pàdîbo bàcìmòna cyènzeka. Kaa, Toomààsè wàkabwela, kadi wàkalwa pashiishe ndambu.

<sup>102</sup> Mpindyewu pàdîbo bàmòna bintu bìdi bidyànjlila kwamba abi, ne byamba ne EMU MMÛDÌ MUKALENGE WÀMBA, byènzeka, dîbà adi bàdi bàmba ne: “Tùpèèshaayikù ndambu wa Maanyi enu awu.” Nwamonu anyi?

<sup>103</sup> Kadi monaayi mpindyewu, bwenzeji. Míngà misangu bantu banene bàtu bàdisanga. Udi ubùmvwà bàmba ne: “Munene *Kampanda*, ne munene *Kansanga*, munene wetù. . .” Kanwènjikù nanku to.

Kakwènà banene munkaci mwetu to. Kùdi munene anu Umwepele, mwine awu n’Nzambi. Twètù tudi bàna bàà muntu, balume ne bakaji. Nansha wèwè mwikàle mpaasàtà wa ekeleeziya udi ne bantu bataanu, aci kacýèna cikuvwija mukese to; aci cidi cìkwenza mwaneetu, wamònu’s, pawikalà ne lulamatu ku Dîyì dya Nzambi. Nansha cinyì, nansha munyi; kwèna ushààla mukese to. Nzambi kàtu ne bàna bakese ne bàna banene nansha. Yèyè ùdi anu ne bàna. Bàdi bònso anu bàà mwomumwe.

<sup>104</sup> Monaayi, Nzambi Yèyè mwine’s wàkafùmina mu myaba mitàmbe bulenga ya mu Butumbi, bwa kulwaYe umwe wetù. Mpindyewu munene mwaba awu nganyi? Wàkangata. . . Kààkalwa panshi apa bwa kwangata mmwènèkelu wa mwakwidi to, kadi wa musadidi. KwoweshaYe diima diinè dyàkafùkàYe adi màyi, makàsà a bapostolo Bèndè ne bakwabo. Mpindyewu munene ki nganyi?

<sup>105</sup> Kadi bwenzenji, ki bùvwà bantu aba bapetè. Bòbò kabààkuumvwà to. Bààkeela meeji ne cintu cipyacipyà necyènzekè, to, cintu kampanda cìvwà Nzambi kàyi mwambe ne necyènzekè. Bààkayakù mu mushindu mubi.

Ki dizùka dyònsò edi, pàvwà . . . bibangè kale wàwa, kùkaadi ntàntà mule, bikèngela bwa dingumba ne dingumba dyònsò diikalè ne mwondopi wa kùdi Nzambi; bìvwà bikèngela bwa dingumba ne dingumba dyònsò diikalè ne *cikampanda*, *cikansanga*, anyi *cikankenga*. Bìvwà bikèngela bwa dingumba ne dingumba dyònsò diikalèku ne kaaDavidi kampanda. Bìvwà bikèngela bwa dyònsò diikalèku ne *cikampanda*, *cikansanga*, anyi *cikankenga*. Nwamonu cidi cyènzèke anyi? Cyènji cintu



cimwecimwe cyàkenzàci kaaba aka. Cintu anu cimwecimwe aci's. Bwenzeji!

106 Dìyì bwa movù awu, cikondo civwàbo ne mwoyi aci, mbyàkabèngàbo kucyùka.

107 Monaayi ne, “makaaya a beena Lewi,” ki civwà mushindu wà ku cibangidilu, mulongolola wà Nzambi bwa kwenza bintu ebi. “Ikàlaayi nwambwila mushèètè wà cipungidi awu pa makaaya a beena Lewi.” Cyònsò civwà kaciyi aci civwa cibèngàngàne. CivwàYe Yèyè wàmba aci, ki civwàYe muswe kwamba. Nzambi kèna mwa kushintuluka nansha. Ki bwa cinyi, shàalaayi ne Dìyì Dyèndè! Mémè ndi ne Mufùndù, eyowa, Kulondolola wa Kumpala 15.15, panwikalà baswè kucifùnda. Monaayi.

108 Mpindyewu monaayi, mwaba awu, mu kulonda kwa Nzambi amu. Mpindyewu ndi muswe bwa nwènù kufùnda cyòci eci mu mushindu kampanda mu meeji enu amu. Bwa kulama mèyi matùma a Nzambi, bwa kwenza cintu kanà cyònsò cijaalàme bwa Nzambi, bwa kwenzela—bwa kwenzela Nzambi mudimu mu mushindu mujaalàme, kùdi bintu bitaanu bìdì ne cya kwenjiibwa, bwa kwenzela Nzambi mudimu mu mushindu mujaalàme

109 Mpindyewu Davidi ùvwa wènzela Nzambi mudimu. Ùvwa wènza cyònsò civwàye pèndè mumanye mwa kwenza aci, pa kuumusha kushiya kwa Nzambi ku luseke. Nwamonu anyi? Ùvwa wènza cintu kampanda civwà cijaalàme, cintu cimpè bwa cisàmba, cintu cimpè bwa ekeleeziya.

110 Kadi bintu bitaanu bìdì ne cya kwenjiibwa ebi, ndi muswe bwa nùvulukè byòbi ebi. Muntu nansha mwikalè ne meeji matòòke a bishi mu dicyènza, mu kwenzela kwa Nzambi mudimu, eci, bitaanu ebi bìdì ne cya kwikalakù.

Cya kumpala, cìdi ne cya kwikala díbà Dyèndè Yèyè dya kucyènza.

111 Anjì ambàayi túng bu—bu Mòsà mulwe, wàmba ne: “Netwibakè bwàtù bwa twètù kulèlema pa musulu wà Nil, mwàkenza Nowà amu”? Cikondo cya Nowà civwa cimpè bwa bwàtù, kadi kí mbwà cyèndè cikondo yèyè to.

112 Anjì ambàayi túng bu Yesu mulwe, mwambe ne: “Mpindyewu Mémè ndi nwàmbile citwènzà. Netùbandè anu pa mukuna, mwàkenzà Mòsà amu, bwa kupeta difila dipyadiya dya mikenji”? Nwamonu anyi? Huh-uh! Yèyè's ki uvwa mikenji ayi. Nwamonu anyi?

113 Wèwè udi ne cya kwikala mu cikondo Cyèndè Yèyè. Cìdi ne cya kwikala mu movù Wèndè Yèyè. Nuumvù aci mpindyewu anyi? Cìdi ne cya kwikala mu cikondo Cyèndè Yèyè. Cìdi ne cya kwikala mu movù Wèndè Yèyè, cikondo ne movù.

114 Ne cìdi ne cya kwikala bilondèshile Dìyì Dyèndè dikàadi dyakùdiibwe. Cìdi ne cya kwikala. Nansha wèwè wamba bimpè

ne bivwa bikèngela *cikampanda* cìikalèku, anyi bivwa bikèngela *cikansanga* cìikalèku, anyi bivwa bikèngela *cikankenga* cìikalèku. Bidi bikèngela cìikalè bilondèshile Dìyi Dyèndè, bilondèshile cikondo Cyèndè ne muvù Wèndè.

Ne cidi ne cya kwikala cìfidìibwe bilondèshile, bacìpèèshe muntu udiYè musungule bwa kucyènzela kùdiye awu.

<sup>115</sup> Nansha byôbi ne mbantu banene bàà myânzù bàà munyi. S'ki mfumu Davìdi nyêyè awu, munene anu mùdi yònsò wa kùdìbo. Yéyè's ùvwa mfumu kumutu kwa ditunga. Kadi Yéyè ùvwa ne mushindu wà dicyènza, ne Ùvwa mubàmbile mùvwàYe mwa kucyènza. Kadi bôbò bàakapanga kucyènza.

<sup>116</sup> Cidi ne cya kwikala bilondèshile Dìyi Dyèndè, bilondèshile cikondo Cyèndè, bilondèshile ndongamu Wèndè.

<sup>117</sup> Ne cidi ne cya kwenjiibwa kùdi muntu udiYè musungule bwa kumupèèshaci ne bwa kucyènzayè awu. Mòsà wàkateeta kucinyeema ne: "Angàtaku muntu mukwabo." Kadi Nzambi ùvwa musungule Mòsà bwa kucyènzayè. Bàbúngì bàà kùdìbo; Pòlò wàkateeta bwa kuumushamù mukolo; bakwabo bàabúngì. Kadi bìdi bikèngela cyènjiibwè kùdi ewu udiYè ùsungula bwa kucyènzayè awu.

Ne cidi ne cya kulwa, dyambedi, kùdi baprofeta Bèndè. Dìyi dya Nzambi dìdi ne cya kulwa kùdi baprofeta. Amòsà 3.7: "Mukalenge Nzambi kàakwenza cintu nansha cimwe pàdiYe kàyi mwanji kuCibuulwila musadidi Wèndè muprofeta to." Inaayi.

<sup>118</sup> Ne muprofeta awu ùdi ne cya kwikala mushindika ku Dìyi dya Nzambi.

<sup>119</sup> Ki bintu byenu bitaanu bìdi ne cya kwenjiibwa mbyôbi abi. Cidi ne cya kwikala mushindu awu. Cikondo Cyèndè, muvù Wèndè, mùdiYe mwambe ne necìikalè amu; ne muntu udiYè musungule; ne cidi ne cya kulwila kùdi muprofeta; ne muprofeta ùdi ne cya kwikala muprofeta mushindika. Tudi tusangana ne, bàabúngì bàà kùdìbo mu Bible, cìvwa cìlwa kùdi baprofeta kadi kaciyi cìshindikiibwe to. Wetù Muprofeta n'Yesu Kilisto.

<sup>120</sup> Pa nanku monaayi mpindyewu, nwamonu's, Nzambi kàvwa mubàbuulwile cintu aci ku mushindu Wèndè mulongolola wa dicyènza to. Bôbò bàvwa biitàbe mushindu wà Davìdi awu. Bàvwa biitàbe mushindu wà baakwidi wu. Bàvwa biitàbe mushindu wà bafùndi, wà beena tèlòlòjì, kadi kì mmushindu wà Nzambi to. Natànàèlè, ùvwa, yéyè nguvwa muprofeta wa dituku adi. Pashìishe, Natànàèlè wàkabàmbila mwa kucyènza. Kadi, nwamonu's, bàakacyènza kabàyi bakonkè Natànàèlè to. Dìyi nansha dìmwe kadyènakù dyàmbe ne bàakakonka Natànàèlè to. Bwenzeji bwònsò, cintu cinène munkaci mwa kutungunuka! Kadi, ekelekele, mèmè ndi ngeela meeji ku musambu awu wà ne: "Lekela, lamà . . ."

Nkwàcishèku, Mukalenge, pàdì myoyi  
 mikwate kapya apa,  
 Enzàku bwa mpwekeshè maditàmishi àànyì  
 (bwa kuya ne bakwabo), nsokè mèmè anu  
 Dìna Dyebe;  
 Ùdongèshèku bwa kubenga kweyemena bìdì  
 bakwabo bènza,  
 Ngìikalè anu mwindile mu disambila  
 dyandamuna dya Kùdì.

Nwamonu's, ki mushindu wà kwenza ngwòwò awu. Neimònè mèmè cyènzeka mu mushindu mujaalàme, dībà adi neciitabuujibwè.

<sup>121</sup> Mpindyewu, Nzambi ùwà mubàbuulwile cintu aci kùdì Davidi, ne kùdì bambi, ne kùdì bantu, ne kùdì baakàpíteenà bàà binunu, ne baakàpíteenà bàà nkama, kadi kî nkùdì Natànàèlà uvwa ne EMU MMÛDÌ MUKALENGE WÀMBA awu to. Kadi Mukalenge ùwà mwambe ne Yèyè kàwva mwa kwenza cintu nansha cimwe to pàvwàYe kàyi mwanji kuleeja, dyambedi, muprofeta wa cikondo awu cya dyenza. Nwamonu cyàkenzàbo anyi? Bàakapàtuka buludi mu Dìyi dya Nzambi, kuya e kutèeka mushèètè wa cipungidi awu mu ditempu dipyadipyà. Nwamonu anyi? Pa nanku bàakaya kacýenza kacyi bilondèshile dìyi ditùma dya Nzambi ne mushindu mulongolola wà Nzambi to.

Ne cyòci aci ncidì cyenzèke leelu ewu, balunda bàànyì. Ki bwa cinyì tudi benzè bibilù binène bya butangadiki búngì cyanàànà, ne bikwabo, kadi kakùyì bipeta to. Bupidya bulwè kuvulangana, mpekaatu mulwe kuvulangana, kabidi... Ndi nnwambila ne, bwa edi ditunga nkujikè; kî ng'anu edi ditunga nkààyaadi to, kadi matunga makwabo kabidi. Edi ditunga, byenze bu Angletterre wa cikondo cikwabo cyàcya, ndishààle ndumba wa matunga makwabo ónsò.

<sup>122</sup> Munda menemene mwa Mozambique mwàmwa, mu ntàntà wa kilòmèètà nkama mwandamutekete ne makumi asambombo ne mwadamukulu kule ne dishidimuka, mu bisuku ne meetu, bânà baamùyààpàndì bàdi bàtèèleja Elvis Presley, banyungisha mitu ne bàtùpika bàya muulu bàalukila mushindu awu, bufùkù bujimà, biikàle ne nshinga... Anyi, tusanji tukese mushindu ewu tudi tükòka mèyi mu ntàntà wa kilòmèètà cinunu ne nkama yisambombo, too ne mu Rhodésie, bwa kukwàta dìyi dya Elvis Presley. Kadi bàmba ne: "Mmutendeledi wa dikema, yèyè ne Pat Boone, ne bakwabo abu." Mona's, yèyè's n'Yudààsè wa dībà edi, kadi kî mbamanyè to. Cibadi cidì cibi's ki cyòci aci, bàdi bìitabuuja ne bóbò abu bàdi—bàdi mu bulelela.

Yesu kààkambilakù Cikondo cya Ekeleeziya cya Laodikiya eci ne: "Wèwè udi butaka, mwena dikenga, mukèngeledi wa luse, mpofo, kadi kùyì mumanyè" anyi? Kî mbacimanyè to!

<sup>123</sup> Ee, bàà bàà beena Mpenta bàà mu Afrike ne kukwàbò kwònsò, bàdi bàmba ne: “Ee, Elvis Presley, ùdi ne ngimbilù mutàmbe bulenga wùtù kùyikù mwanjì kuumvwa to.” Kakùyì mpatà to ne Davidi pèndè uvwa nendè; kakùyì mpatà to ne bimbi bàà misambu abu bàvwa pààbò nendè, kadi’s ncyàkatwàlà lufu lwàkadikùmà mu citùùdilu alu. Nudi numona kùkaadibo, kutùkaadi leelu ewu eku anyì, nwènù balunda bàànyì?

<sup>124</sup> “Makaaya a beena Lewi,” ki cìvwà mushindu wà ku cibangidilu wà Nzambi wà dicyènza. Kadi bôbò bààkawùtèeka mu ditempu dipyadipyà. Mpindyewu, kabyàkukùmbanakù to. Kabàvwa bakonkè mushindu mujaalàme to. Nwamonu anyi? Pa nanku, bààkapàtuka mu njila, pa bwalu abu, ne bààkaya naabi mu mushindu mubi.

<sup>125</sup> Nenu ki cìdì cyenzèke leelu ewu ncyôci aci. Pàdi bantu, nansha ne meeji matòòke a bishi, bàteeta bwa kuMwenzela mudimu kacìyi mushindu Wèndè mulongolola wà dicibuulula to, bàdi misangu yònsò anu bàbibwejakaja. Nzambi ùdi ùcitàeka mu Wèndè mushindu. Nwènù bantu, nansha nwènù ne meeji matòòke a bishi, panùdi nuteeta bwa kucyènza bishiilàngàne ne cyôci aci, nenù—nenùbinyangè.

<sup>126</sup> Byenzè bu mùvwà Baalàmà, mu dituku dya Baalàmà. Nzambi wàkambila Baalàmà, muprofeta awu. Ùvwa muprofeta, muprofeta Baalàmà. Ùvwa muprofeta, nenu Dìyì dyàkalwa kùdiye anu menemene, dyàmbe ne: “Kùyì kuntwaku to. Abu mbasungula Bàànyì. Adi ndisungula Dyànyì.”

Kadi Baalàmà kupetanganaye ne bantu banene bàà myànzù, basalaayi, bayiishi, bantu bàvwà bapetè bwenzeji, kwambaye ne: “Ee, ndi—ndi nnwambile ne, mfumu neikala . . .”

Nwamonu’s, bikùmbànàngàne anu menemene ne bya Davidi, bikùmbànàngàne ne bya leelu ewu. Angàtaayi anu byònsò mu cifwànyikijilu, nenu nenùcìmònè. Nudi nucìmona anyi? Ambàayi ne: “Amen.” [Disangisha dìdi dyàmbe ne: “Amen.”—Muf.] Nwamonu’s, nwamonu’s, anu mùdìbi mpindyewu’s.

<sup>127</sup> Kadi balombodi bàà ekeleeziya kwambabo, baa—baa—baakwidi kwambabo, bafùndi kwambabo, beena tèdòlòjì kwambabo, ne: *Ewu* ki mushindu wùdìci ne cya kwenjiibwa.” Kadi, kabìvwa nanku to, ne kujaadikiibwabi ne kabìvwa nanku to.

<sup>128</sup> Kadi Nzambi ùvwa mwambile Baalàmà, ne yèyè ùvwa muprofeta, dyambedi, kumwambilaYe ne: “Kùyikù to.”

<sup>129</sup> Kadi bwenzeji bwa kùdi bantu bakwabo aba bwàkamufikisha ku dicyènza bibèngàngàne ne mùvwà Nzambi mwambe bwa kucyènza, ki kulwaci mulawu pamutu pàà kwikalaci ditàbuluja. Kaa, bushuwa’s, kuyaye kuntwaku ne kulongeshaye bantu, kwamba ne: “Mpindyewu anjì indilaayi! Nudi bamanye mùdi bwalu anyi?” Yèyè ne: “Twètù tudi—tudi

beena Moàbà. S'nudi bavùlùke ne, mwànà wa bakaji wa Lotà ki wetù mukalenge-mukaji. Yèyè's ki wetù nkambwa. Tudi bônso bàà mashi amwe. Tudi bônso . . . Mangumba etu ônsò àdi a mwomumwe." Kanùdisangiku ne cintu aci to. Shààlaayi kule naakù. Nwamonu anyi? Ki kwambaye ne: "Tudi bônso anu mwomumwe. Mona's, bantu beenu bàdi anu mùdi bantu bàanyi. Tudi mwa kuselangana, munkaci mwetu, umwe munkaci mwetu, bwa twamòna mwa kwikala ne nsangilu wa bukwántèndeleele mulelela. Nwamonu anyi? Twètù bônso tudi mwa kudìsanga ne kwalukila cyakabidi ku cintu cya ku cibangidilu aci."

Nzambi kwelaYe cintu aci mulawu. Awu mpekaatu kabààkamufwilakù Izaleela luse to. Wàkashààla mubàlamàte matuku abo ônsò. Kààkafwidiibwakù luse to. Bàkabùtukila nendè mu cipeela. Ncya bushuwa. Bwalu kabààkangata mushindu mulongolola kùdi Nzambi ku mushindu Wèndè mushindika wà dicyènza to.

<sup>130</sup> Monaayi, cintu cyàkenzàbo eci cyàkafikisha Izaleela ku kufwa lufu lubi, mu cipeela. Ne Yesu wàkamba ne: "Bônso muntu ne muntu bàkabùtuka ne kwàbò kujikè." Tàngilàayi numone ne mbanganyi bààkashààla biimàne ne Mòsà kuntwaku: Yoshùwà ne Kaalèbà, mu—mu ndongamu awu.

<sup>131</sup> Monaayi kabidi, ki Davìdi nyèyè ewu, cyàkenzàye aci. Ne pàkacyènzàye, cyàkenzàci ncinyi? S'cyàkafikisha lufu ku dituuta muntu uvwa ne meeji matòòke.

Mpindyewu, ngeela meeji ne tuçidi anu ku nshinga, ne ndi muswe bwa nwènù kutèeleja mu ditunga dijimà.

Cintu cyàkenzà Davìdi eci, kàyikù ùkonka Natànàèlè ne wàngatakù Dìyi dya Mukalenge bwa bwalu abu to, cyàkafikisha lufu bwa kutuutalù bantu bàà meeji matòòke. Eyowa's, mukalenge. Kwololaye cyanza, yèyè uvwakù musòmbèle mu bwikadi bwa mushèètè wà cipungidi awu; wòwò wùvwa wùpàtuka mu nzubu mwèndè—mwèndè. Nenu ngombe kutetukayè, ne mushèètè wùkaavwa wamba kupona.

<sup>132</sup> Bòbò bàkaavwa bamanè kwenza cintu cibi cimwe, bintu bibi bibidi. Cya kumpala, kabàvwakù bakonkè Natànàèlè to. Cintu civwà cilondèle cyàkenzàbo, bààkaya kuntwaku kabàyikù bakonkè Dìyi dya Nzambi to. Bwalu, kùdi . . . Samwèlè ùvwa Dìyi mu dituku adi . . . Nenu yèyè kààkonkakù Dìyi dya Mukalenge to. Dìbà adi, pààkenzàbo nanku, bààkenza bibèngàngàne ne Dìyi dya Nzambi.

Nenu muntu mwìmpè ewu, uvwa mulami wa ditempu, ùvwa mwepiskopo ewu, kudya mbidilayè ne: "Ee, apa, ncyèna muswe bwa kulekelabo Nzambi ùpòna panshi to," ki kutèekaye cyanza pa mushèètè wà cipungidi. Bya bwalu, yèyè kàvwa mwena Lewi to, ki kufwaye. Bintu bisatu!

<sup>133</sup> Mpindyewu elànganaayi meeji bya bikole, ne tàngilàayi nùmonè cidi mangumba menze leelu ewu. Nwamonu's,

mbaCìdyombòle, baCìbìikile ne “ndilongesha dya mashimi.” Nwamonu anyi? Tàngilàayi kùkaadìbo. Nebàpetè nsangilu wabò wa bukwántèndeleele awu, eyo. MbaCìbìikile ne “ndibala dya mu meeji a bantu,” pààbì Nzambi Yèyè mwine munkaci mwa kuCìshindika ne ki Bulelela, ne kujaadika mùdìCi Bulelela. “Kaa, bôbò’s bàdi anu mmusumbà mukese wà bidingidingi kuntu kwàka,” mùdìbo bàmba, “kì mbamanyè bidìbo bàmba abi to.”

Neya bushuwa, katwena bamanyè to. Kadi tudi twamba twètù anu Méyì Èndè cyanaàna, kadi Yèyè ngudi mumanyè cìdìYe wàmba, nwamonu’s. Mémè ncyèna mwa kuCyùmvwija to, anyi muntu mukwabo nansha umwe, kadi Yèyè—Yèyè—Yèyè ùdì ùCìjaadika.

<sup>134</sup> Mpindyewu monaayi. Beena kwitabuuja bààbùngì bàà meeji matòòke leelu ewu, bàdi bàlwa kùdì Kilisto, baswè kulwa ne mwoyi wàbò wònsò, bàdi bàshebeyiibwa mu nyuma mushindu wumwewumwe awu. Bantu bààbùngì bàà meeji matòòke bàyaaya mu ekeleeziya wa Katolike ne bàjinga bwa kulwa beena Kilisto, bàya mu ekeleeziya wa ba-Méthodistes, wa ba-Baptistes, mu église de Christ, ne mu beena Mpenta mene, nwamonu’s, muntu ùjinga kwikala mwena Kilisto, utèekapù cyanza, ùdìvwija wa ku bôbò abu.

<sup>135</sup> Kadi pààkamònà Davidì cintu eci cyènzeka, kumutàbulujaci. Kùtàbuluku dìbà dimanè kupita kuntwaku to, mwaneetu. Yèyè wàkamònà ne lufu lwàkadikùma.

Ndeejè wèwè bipeta. Bwa cinyi ditàbuluja dya ku dìnà edi, diikàle dyàluja bantu mu maekeleeziya, ndyenzèle ditunga cinyi, ndyenzèle mu—mubidi wà beena kwitabuuja cinyi? Kì ndyenze cintu to anu malongolodi ne mangumba mapyamàpyà, ntàntà yònsò mujimà ewu, kuvudija anu bidimba ne bikwabo. Ditunga ndilengèle anyi? Bàvwa bàmba ne nebìikalè mwa . . .

<sup>136</sup> “Amerike. Nzambi àbeneshè Amerike. Yèyè—yèyè nditunga, ditunga dya beena Kilisto.”

Dyôdi’s didi ntàntà wa mùlìyò wà kilòmèètà kule ne kwikala ditunga dya beena Kilisto. Mémè ncyèna mene ndisambidilakù to. Mmunyì mùndì mwa kudìsambidila, pàdidi kadiyi diswè kunyingalala ku bwenzeji bwa makole manene a Nzambi mamwenèshùbwe kumpala kwàdì aa; kadi diikàle dìvila, ne dìDikàngila biibi, ne dyàsa lwendu dìya? Ndi ndilàmbula dyôdi kùdì Nzambi. Kadi dyôdi didi ditàmba anu kuya kule. Kadi mpindyewu neditukine mu màyi. Tàngilàayi anu cyanaàna nùmonè cìdì cyènzekà.

<sup>137</sup> Bantu bààbùngì bàà meeji matòòke bàya kashààla bàà mu bulongolodi, anyi cisùmbù kampanda, anyi kasùmbù kàà ntendeleele kàà mushindu kampanda, kadi ki kufwàbo eku’s, mu nyuma. Kwènàku ne cyùdì mwa kubambila to. Bàdi ne bintu abi byelè miji munda mwabo ne: “Mona’s, beepiskopo aba’s

mbàdi bambe eci. Ne *cikampanda's* ncyambe eci, ne *cikansanga's* ncyambe eci.” Udi ubàleeja mu Dìyì dya Nzambi emu mene mwaba wùdìci EMU MMUDÌ MUKALENGE WÀMBA. “Kadi wetù mpaasàtà. . .”

Cìdi wenù mpaasàtà wàmba nansha ciikàle cinyi, cìndi mèmè ngamba, anyì cìdi muntu mukwabo yònsò wàmba nansha ciikàle cinyi. Cyòci cibèngangana ne Dìyì dishindika dya Nzambi, díbà, cikondo, Mukenji, ne bikwabo, ùcipwè mwoyi. Shààla kule naaci. Ne nebikèngelè bwa mèmè kwimana kumpala kwa yònsò wa kunùdi mu Dituku dya Cilumbulwidi, ne nudi bamanye nanku. Ne ncyèna mufwànyine kwamba aci pàànyì anu bwa cyanààna to, bu mùndi mumanye ne nkààdi muntu mununu mpindyewu. Mèmè nê- . . . Kì nne mèmè ndi mumanye cintu kampanda to, kadi Yèyè ngudi mumanye. Ndi mèmè ndonda anu cidiYe Yèyè wàmba aci.

138 Tàngilàayi leelu ewu bibilù binènè bya butangadiki bitùdi benze mu ditunga dijimà abi. S’mbijaadikiùbwe ne mbyenjiiùbwe mu cijengu. Ne Yesu kàakambakù mwaba ewu mpindyewu, mu Luukà 7.7 emu ne: “Bàdi bàNkuukwila mu cijengu” anyi? Davidi wàkalwa ne mushèètè wà cipungidi awu mu cijengu. Aakàbà wàkalongesha baprofeta abu mu cijengu. Baalàmà wàkangata mfranga ayi mu cijengu, “Bàlongesha mèyi matùma a bantu bu ne ki Dilongesha.” Mèyi matùma a Nzambi ngàdi ne mushinga, nansha meeji matòòk- . . .

139 “Bantu abu’s bàdi ne meeji matòòke bulelela.” Nutu nuumvwa bikole bàmba cyòci ne: “Bàdi ne meeji matòòke be.” Aci kaciyèna ne cìdici cyùmvwija nansha. Ba-Témoins de Jéhovah, ba-Adventistes du Septième jour, ne tusùmbù twònsò twa ntendeleelu atu, bàdi bàpátuka mu mùsèèsù emu bènza bintu bìdì nansha umwe wa kutùdi kàyikù mufwànyine kwenza to. Beena Katolike bàtu bìimana mu masangu a njila bàlòmbangana kàà pa luse, ne bikwabo, tusùmbù twabo atu mushindu awu, pààbo ne ndola binunu bya miliyò kuvudija ku binunu bya miliyò kuvudija ku binunu bya miliyò, biikàle anu balomba kàà pa luse. Ne meeji matòòke, kakùyì mpatà to. Ekeleeziya yìya ne—ne yikayiisha, ne bikwabo, ne bambi bìimana mu cyambilu bènza ne mwabo mwònsò bwa kufikisha bidimba bipyabìpyà ku dibwela mu ekeleeziya yabo; kadi s’mmushèètè wà cipungidi mupyamùpyà awu.

Kùdi Mushèètè wà cipungidi anu wumwepele wà dilonda, ki Dìyì dya Nzambi. Cyònsò cya cibèngangana ne wòwò Mushèètè wà cipungidi awu, shààla kule naaci! Cìdi mu ditempu dipyadiyà, kadi kaciyi pa makaaya a Nzambi to. Cya bushuwa. Shààla kule ne cintu aci. Kwikadikù naaci bwalu nansha bumwe to.

140 Bibilù byetu binènè bya butangadiki, bantu miliyaalà ne miliyalà mbajikùle diitabuuja dyabo. Kadi ndi ngeela

mpatà bwa ne mbafwànyine kwikala lukama, pa bònsò abu. Nwamonu's, kacitu anu cintu ciine to.

Kadi tàngijà mèsù ku mulayi wà Dìyì.

<sup>141</sup> Newèlè meeji ne ncipangile bwalu, ne twètù tudi bamanyè ne ncipangile. Bamwe bàà ku benji bàà matàbuluja bàà—bàà batàmbe bunene mu ditunga leelu ewu bàdi bàmba ne mbipangile bya byènza ne mwadi. Ekeleeziya's mmumanye ne mbipangile. Bantu bònsò mbamanye ne mbipangile. Ee, mbwà cinyi abu? Mbipangile bwa cinyi?

Cìvwa mbwà kiiipàcilà kîmpè. Cìvwa mbwà kufikisha bantu mu Bwikadi bwa Nzambi, bibilù binènè bya butangadiki abi. Ne miliyò ya bantu mmbatùlètùlè mfranga, ne bayèlè mu bibilù binènè bya butangadiki. Ekeleeziya yikaadikù yònsò midisangè, mu mabalaasa manene, ne bintu binène, ne bintu binène bikaadikù byenzèke. Mbipangile bwa cinyi? Mbwalu kabàtukù bamanyè dîbà dîdîbo ne mwoyi to.

Kabyena bikèmesha to mwàkiimanà Yesu, ne mwàkadilàYe mwadi mu mwoyi Wèndè. Binsonji byàkaMupwekela pa matama, ne Wàkamba ne: “Yèlusàlèmà, Èyì Yèlusàlèmà, mmisangu bùngi kaayi yìnkaadiku Mèmè ewu muswe kukukùngwija, mùdi nzoolo wa cikuka ùkùngwija twànà twèndè (wèwè udi mwase muprofeta yònsò ùNdì mukutùmine mabwe), kadi kwèna muswe to! Kadi mpindyewu dîbà dyebe dyàfiki.”

<sup>142</sup> Kwènàku mwa kuumvwa Nyuma Mwîmpè wèlela mbila mikole munda emu anyi? “Kaa, Ètats-Unis ne buloba bujimà, mmisangu bùngi kaayi yìnkaadiku Mèmè ewu muswe bwa kunùkungwija, kadi kanwena baswe to. Mpindyewu dîbà dyenu dyàfiki. Nzambi wenù wa bisànkasanka awu, nzambi wenù wa bukooya awu, nzambi wenù wa Sodomà ne Gomòlà awu, nyawu ùkaadi mulwe munkaci mwenu.” Nansha mene bânà beetu bakese balela, nsuki mikòsa bu ya baamùyààpàndi ne myalala ya nsuki mibàlembèlèle mu mpala, s'ntwànà tukese twà nsòmbelu mukonyàngàle tùi túbangà atu. Bakaji beetu kwàbò kùkaadi kujikè. Cìkaadi cipite ciyè ne dyamwàmwa dya bupikudi. Balume beetu bàkaadi balwè bilùmaabikàji binène, bènda bèndakana bavwàle tùpanù tukese, twîpi, ne bènza maalu bu mwànà wa bakaji, ne nsuki mibàpwekèle mu makoshi. Nenku tudi beena Sodomà, ne kapyà ne ciiji cikole cya Nzambi mbitwîndile.

<sup>143</sup> Nudi bamanyè mwàshebeyàYe, mwacibùtulàYe anyi? Mushindu wùkaadiYe mwenzènze awu. Pàvwà ndumba wènza cintu cya cibi, bàvwa bàmwasa mabwe bàmushebeyà; bàvwa bàngula mabwe bwa kushebeyà mukaji uvwa ndumba. Mushindu awu ki wàshebeyàYe ekeleeziya. Bible mmwambe ne Yèyè neàlòkeshè mvula wa mabwe àfùmina mu maulu, ikalà ne bujitu bwa kilò makumi anaayi ne yitaanu ku dibwe dimwe, nenku yèyè neàbàshebeyè ne mabwe. WàMwimanyika ki nganyi?



Mmaalu kaayi a mamanya ikalà mwa kwamba ne kacyèna mwa kwenzeka? Yèyè's neàcyènze.

Bya mwomumwe ne mwàkenzàYe bwâtù e kulèlemija Nowà mu dikubiibwa amu, Yèyè neàcyènzè cyakabidi bwa Ekeleeziya Wendè.

Nenku ku mikenji Yèndè Yèyè mwine ne mushindu Wèndè Yèyè mwine, Yèyè neàshebeyè ne mabwe ndumba udi mwendè masandi ne bamfumu bàà pa buloba ne baakàpiteenà bàà nkama ne bàà binunu awu. Yèyè neàmwasè mabwe àmushebèyè, ku mikenji Yèndè Yèyè mwine yìdiYe mutèèke mu bulongame ayi. Nganyì wàmWambila ne Yèyè kèna mwa kwenza mvula wa mabwe?

<sup>144</sup> Anjì konkàbi muntu kampana udi mumanyè mùtù dimata dya mvula dìbanga. Nenku dyòdi didi dyènza cijengu, ne dyàlukila dìpicila mu cinyùnguluji kampana; cidi ciàmbulu anu kuàmbulu, too ne pàdidi dìneema bujitu kampana, ne pashìishe dìmata panshi.

Yèyè, Nzambi, Yèyè uvwa . . . dikokiibwa dya kùdi buloba kàdìvwakù mwa kuMulamina panshi to, kàdi Wàkabànda e kuya mu Dyulu. Nzambi, Yèyè wàkenza dikokiibwa dya kùdi buloba awu, ùdi kabidi mwa kwenza cinyùnguluji bunene bukùmbàne bwa kuyùngululu dibwe too ne pàdidi dìpeta bujitu bwa kilò makumi anaayi ne yitaanu. Yèyè mmwambe ne Neàcyènzè, ne Yèyè neàcyènzè. Nganyì wàmWambila bwa kacyènji? Yèyè neàcyènzè, bwalu Yèyè mmwambe ne Neàcyènzè.

<sup>145</sup> Tudi mu matuku a ndekeelu. Tudi biimàne pabwìpì ne cilumbulwidi. Bwa cinyì? Bàdi bàteeta kudya manà a kale àkamata kuntu kwàka kùkaadi bidimu makumi ataanu awu, ekeleeziya wa Mpenta. Ekeleeziya wa Cijila ùdi ùteeta pèndè, a kùkaadi bidimu bipite pa nkama yibidi. Ba-Luthériens, a kùkaadi bidimu biipacila ku nkama yisatu, anyì bipite apu, a kùkaadi bidimu's, a kùkaadi bidimu nkama yàbùngì. Bàdi bàteeta kudya manà a kale. Kaa, mwaneetu, cintàkanyì aci's cikaadi cilèngàme. S'cikaadi citàpile twishì. Neciikale . . . Cikaadi ne—cikaadi ne . . . Mona's, mvwa misangu yònsò ngamba anu ne, tusàndà tubwelèmu, bikusù. S'nebikushebèyè, wèwè mubìdye.

<sup>146</sup> Anjì kujandulaayi tǔng ní Davidì anyì nì nganyì wa ku bakwabo abu ùvwaku mukonkè Dyàmpà dya dìbà adi.

Baakwidi, ne baprofeta, ne bayiishi, ne beena tèlòlòjì, ne bilongelu, ne mangumba, bu biikalakù anu bakonkè dìbà's wè! Kadi mpindyewu kacyàkubàkwàcishakù to. Cikaadi cimane kupìcila matuku. Kacyàkwambulwìshakù to nansha dikese. Mukaji awu bwèndè mbujikè mpindyewu. Ùkaadi musambùke mukàlù awu kùkaadi bidimu bitwe ku bitaanu, pankaci pàà kanyinganyinga, cilumbulwidi ne luse.

147 Monaayi, cìdiku ncinyi dîbà adi? Cìdi mwa kwenza ncinyi? Cìdi cìkèngelà kwenza ncinyi? Tùkonkàayi muprofeta, Bible, Kutùdi katùyi mwa kusakidila anyi kuumushila. Twètù basàkidile anyi buumùshile, Nzambi ùdi ùtùùmusha ku Mukanda wà Mwoyi.

Bible mmwambe, mu Maalàki 4, cìvwà mwa kwenzeka leelu. Bwàkabuulwibwà 10, mùvwa Bitampi Mwandamutekete mwa kukàngudiibwa ne kubuulula maalu masokoka ònsò aa àvwà masokoka mu bikondo bya balongolodi aba! Yéyè mmwambe mùvwàci mwa kwenjiibwa. Cìdi mu Bible: EMU MMÙDÌ MUKALENGE WÀMBA. Nzambi mmumanyishe cyòci aci bulubulu, mu mushindu mupwàngàne; ne muCishindike ne m'Bulelela, ku bimanyinu, maalu a kukema mu mauulu, muulu, ne bikwabo byònsò, munda mwa bidimu makumi asatu ne bisatu.

Nudi nwela meeji ne bòbò nebàCitàèlèjè anyi? To. Bòbò mbafwe. Mbeelè cyanza mu cintu kampanda cìdi cishebèye cintu cyònsò mu kaabujimà. To, kacyàkwenzeka to; kacyàkwenzeka kabidi to, kashidi kàaci.

148 Pààkenzekà ciine cintu eci apu, ki pààkamònà Davìdi. Éyi Nzambi, tùtùminèku Davìdi udi mwa kumona mwaba wùdiye mwimane, udi mwa kutàngila ne kumona ne Nzambi mmwenze mulayi wà cìvwà, mwikalàYe mwa kucyènza leelu. Nzambi mmucyàmbè apa mene mu Dìyi Dyèndè, mùvwàYe mwa kucyènza.

149 Nzambi wàkambila Miikà. Miikà wàkakenketa cikeena-kumona cyèndè kumpala kwa baprofeta nkama yinaayi bàvwàbò bapèèshe myànzu abu. Wàkakenketa cikeena-kumona cyèndè bwa kumona ní cìvwa cijaalàme. Wàkatàngila paanyima ku cikaavwà muprofeta mwambe kumpala kwèndè yéyè, bwa kumona cyàkenzekà. Wàkatàngila paanyima, ne wàkamòna Eliyà awu mwimane kwàka, mwambe ne: “Aakàbà, wèwè pèèbè, mbwa neyilakè mashi ebe.” Mpindyewu, dîbà adi yéyè wàkamona ne cikeena-kumona aci cìvwa cikùmbànàngàne anu menemene ne Dìyi dya Nzambi, ki kucijikulayè. Nenu yéyè ùvwa mwambilemù. Cya bushuwa. Cìvwa bakwabo abu bambe nansha ciikàle cinyi, yéyè wàkashààla anu ne Dìyi adi.

150 Mpindyewu tùtangilàayaaku cikeena-kumona citùdi naaci leelu eci. Nkwibaka kwa maekeleeziya anyi; mbintu bipyabìpyà anyi; mbintu binène byàlwà kwenzeka anyi? Anyi, ncilumbulwidi anyi? Tàngilàayi paanyima nùmonè mulayi wa leelu, nùmonè ne mmu muvù kaayi mutùdi ne mwoyi.

151 Wèwè udi wamba ne: “Ee, Nzambi àbeneshiibwè, mwaneetu, mèmè ndi ne meeji matòòke. Ndi mukashààle wa mu ekeleeziya. Ndi ne dipòlomè dyànyì dya bu-licencié. Ndi mwenze *cikampanda*. Abi mbîmpè, abi mbilenga, kakwèna bwalu nansha bumwe bùbèngangana ne aci to; ki mùvwà pèndè naabi Davìdi, ki mùvwà kabidi baakwidi bàà mu dituku adi naabi, ki mùvwà

kabidi beena tèòlòjì abu naabi. Kadi's bìvwa bibèngàngàne ne Dìyì.

<sup>152</sup> Nzambi mmwambe mùvwàYe mwa kucyènza leelu, mùvwàYe mwa kwalujulula bintu byònsò, cìvwàYe mwa kwenza cyakabidi. Yèyè mmulaye bwa kwalujulula. Aci ncyà bushuwa menemene. Mu Yowèlà 2.28, Yèyè mmulaye ne Neààlujululè. “Mémè nèngààlujululè,” mùdì Mukalenge wàmba, “bidimu byònsò byàkadyàbo kùdì mukùmbì wà yelèkè.” Yòyì yìdì ne dì- . . . Nwamonu's, ncìshì anu cyòci cimwecimwe aci, cidi mu citùpà cya mwoyi cishiilàngàne. Nenku pààkabangà cyena Katolike kudyà, pashiishe ba-Luthériens, ne ba-Méthodistes, ne beena Mpenta, ne bònsò, too ne kwìnshi; Yèyè mmwambe ne: “Mémè nèngààlujulwilè Ekeleeziya bintu byònsò anu menemene mùvwà cyòci aci ku ntwaðijilu amu.”

<sup>153</sup> Tàngilààyi cikeena-kumona aci dilòòlò adi. Anu menemene Mukaji-musela umwèumwè uvwa mulwe *elu* luseke awu, ngudi mulwe *elu* luseke. Paanyima pàà ndumba ayi mimanè kupita mivwàle tulàmbà twabo twa tukese atu, tuntu twabo twa kale tùvwà tubànde mushindu *ewu* atu, ne biikàle bàja maja a bìdùndadùnda, kadi bàdìbìkila mùdìbo Ekeleeziya.

Wèwè udi wamba ne: “Ee, twètù katùtu twenza abi to.”

S'ki mùdì Nzambi ùnùmòna. Kí mmùdì udìmòna wèwè mwine amu to. Mmùdì Nzambi Yèyè ùkumòna. Muntu nansha umwe kàtu ùdìmòna yèyè mwine mu cilèma to. Paùdì utàngila mu lumwènù lwà Dìyì dya Nzambi, Dyòdì ndidì dìkwambila ne udi mu cilèma anyi to. Bu ne Davìdì wàkenzakù cyòci aci, nunku's mmumone cilèmà cyèndè. Bu Aakàbì mwenzèku cyòci aci, anyi bu baprofeta abu benzèku cyòci aci, nunku's mbamòne cilèmà cyabo.

<sup>154</sup> Muprofeta mushìndika ùvwa mwambe ne: “Aakàbà neàfwe, ne mbwa neyilakè mashi èndè.” Ne ciprofeta cyèndè cìvwa cikùmbànàngàne anu menemene naaCi. Dìbà adi kumanyaye ne ùvwa mu bulelela. Nansha Yèhoshàfàtà's bìvwa bikèngela kwikalaye mumone aci ne mucimanyè. Miiikà pààkamònyàye cikeena-kumona aci, kàvwa ùtàmba kupetangana ne bantu bàà mu matuku awu to, kadi yèyè nguvwa ne EMU MMÙDÌ MUKALENGÈ WÀMBA. Yèyè nguvwa mu bulelela.

<sup>155</sup> Monaayi, tudi tulwa ne cintu eci mpindyewu mu dituku edi, patùdì tumona dìbà dya butumbi kutùdì tukafika eku.

Monaayi cìvwa Davìdì ùteeta bwa kwenza, kabidi. Mvwa ne kaacintu kakese kafùnda mwab'ewu pa cyòci aci. Ùvwa ùteeta bwa kulwa ne mushèètè wà cipungidì mu nsesa ya Davìdì, mu dingumba dyèndè sungasunga.

<sup>156</sup> Tàngilààyi paanyima kuntu kwàka pàvwà Mukalenge mwakule bwa musangu wà kumpala ku musulu eku ne: “Anu mùvwà Yone Mubàtiji mutùmibwe bwa kudyànjidila dilwa dya kumpala . . .”

Mwaneetu, beena mu Assemblées kabàvwakù bafwànyine kushàädila panyima to, nansha beena Unis, bôbò bônso. Byàkakèngela bwa kwikalabo ne wa nanku mwaba kampanda. Aa, byàkakèngela bwa bôbò bônso kucyènzabò, nwamonu's, anu menemene's. Byàkakèngela bwa bôbò bônso kulwabo naaci ku nzubu wabò bôbò.

<sup>157</sup> Ûvwa muswe kulwa ne mushèètè awu ku nsesa ya Davidi. Bwa cinyi? Kakùvwa mwaba nansha wumwe muwùlongolwela to.

Nenku ki bwa cinyi kanwènakù mwa kutwàdila dingumba kampanda Mukenji to. Dìyì, Mushèètè wà cipungidi, Kilisto, “umwèumwè awu makeelela, leelu, too ne kashidi,” ne diDimanyishiibwa Dyèndè dyònsò, kwèna mwa kuDìtwàdila bulongolodi bwenu to. Bôbò kabàakuDìitabuujakù to, bwalu kakwèna mwaba bwa Dyôdi adi to. Bible kí mmwambeku ne Yèyè ùvwa ùsanganyiibwa pambelu pàà ekeleeziya wa Cikondo cya Laodikiya, ùteeta bwa kubwela anyi?

Kakùvwa mwaba mu nsesa ya Davidi to, nansha mùvwa nsesa ayi ya lulamatu, ne bunene bùvwàyi abu, ne—ne bikwabo. Kacìvwa anu mwaba mwine to. Mushèètè awu wùvwa ne cya kwikala ku Yèlusàlèma. Ki kwàkayàwu pashiishe, pààkabàmbilà muprofeta cya dyenza naawu. Nwamonu anyi? Pa nanku bìvwa bikèngela bwa Davidi kulwaye naawu mu nsesa yèndè sungasunga. Kakùyi mwaba mulongolola bwàwù wòwò to.

<sup>158</sup> Kilisto ki wètù Mushèètè wà cipungidi, ne bôbò kí mbaswe kuWàkidila to. Kilisto ùdi Dìyì; bôbò kí mbaswe kuWàkidila to. Bôbò mbaswe twitabàayi wabò, dingumba dyabo, mushèètè wà cipungidi mupyamùpyà, anyi—anyi mwambudi mupyamùpyà. Bôbò mbaswe bwa dingumba diikalè diDyàmbùle; mushèètè wà cipungidi mupyamùpyà. Huh!

Vùlukàayi, Kilisto wètù Mushèètè wà cipungidi! Nudi nwtabuujja ne Kilisto ùdi Dìyì anyi? Nenku, kí Mushèètè wà cipungidi ngwòwò awu's. Ncya bushuwa anyi? Eyo. Kilisto kabeena mwa kuya Nendè, ku mwaba Wèndè mujaalàme, kùdi ditempu kampanda dya cyena-mangumba to. Yèyè ùdi ùyiikilangana ne muntu umwepele, kí nne cisumbù. Kacya Yèyè kàtukù muyiikilàngàne ne cisumbù to; muntu umwepele. Byôbì biine, Yèyè mmwambe ne Kààkwenza aci to. Yèyè mwenze nanku, s'Wènji bibèngàngàne ne Dìyì Dyèndè, Amòsà 3.7. Kwèna mwa kufikisha Dyôdi adi ku didinga nansha. To, mukalenge. Dìdi Bulelela.

<sup>159</sup> Kadi, nwamonu's, bôbò bàdi bàteeta. Mushèètè wà cipungidi kawèna mwa kwambwibwa kùdi bulongolodi kampanda to. Mùdi mitu mipitèpìte bùngì munda amu. Nwamonu anyi? Kacyèna mwa kwenjiibwakù to. Yèyè mmulaye ne Kààkucyènzà to, ne Kààkucyènzakù to. Yèyè mmwambe...pàdìbi ne

Yèyè wàkalaya—pàdibi ne Yèyè wàkalaya bwa kucyènza mu mushindu kampanda mukwabo? Ki bwa cinyi Yèyè mmulaye ne Kàakucyènzakù to.

Kanwikadikù nwela meeji awu to. Ndi mwa kuùmvwa. Nwamonu anyi?

<sup>160</sup> Pa nanku Yèyè—Yèyè mmulaye ne Neàcyènzè mu mushindu kampanda, ne cintu kanà cyònsò cya cibèngàngàne ne cyôci aci Yèyè kàakucyènzakù to. Nwamonu anyi? Kadi ku mushindu Wèndè wà ku cibangidilu, bilondèshile cidiYe mwambe mu Amòsà 3.7, ki mwàcyènzàYe. Ne aci cidi ne cya kushìndikiibwa ne kujaadikiibwa ne ncyà bushuwa.

Mpindyewu, nudi bamanyè cidiYe mulaye leelu, dìbà adi's nyewu Ucyènza leelu. Cidi anu cyàkambaYe ne Neènzè aci. Úvwa ne cya kukangula Bitampi Mwandamutekete abi, ne byònsò bìvwàYe mwa kwenza abi; kubuulula maalu masokoka kuntwaku, mùvwà mabàtiiza aa ne bintu byònsò bibwejàkàjiibwe. S'ki cyôci eci, mu Bwikadi Bwèndè mene. Maalu a mamanya's ngàà àcìjaadika. Maulu's àcyàmbi patòòke. Bantu biimàne, bacitàngile buludi, ne bàcìmòna cyènzeka. Kakwèna cintu nansha cimwe cidiYe mwambe cidiYe kàyi muvwije cilelela to. S'ki bwalu mbwòbù abu. Anu bwa nùmonè ne tudi penyì leelu.

<sup>161</sup> Mushindu mwine wùdì muntu kanà yònsò udi ne Nyuma Wèndè, mucimanye; mwikàle ne Nyuma wa Nzambi pambidi pèndè, mmumanye ne Eci m'Bulelela, bwalu Nyuma wa Nzambi kàakwakulakù bibèngàngàne ne Dìyi to. To, to. Yèyè neikalè anu menemene ne Dìyi.

Wèwè udi wamba ne: “Mémè's ndi ne Nyuma Mwìmpè. Nkààdi mwele mbila; nkààdi mwakule mu myakulu. Nkààdi muje maja mu Nyuma.” Abi kabyèna byùmvwija cintu nansha cimwe bwa Nzambi to. Nwamonu anyi?

Davidi's wàkenza cyôci cimwecimwe aci, pabwìpi ne cintu cimwecimwe aci, kwòkù aku. Wàkimba misambu ne bukole bwèndè bwònsò, ne kwelaye mbila ne bukole bwèndè bwònsò. Bakwabo bònsò abu bààkenza nanku, kadi's bàvwa bènda bàvwela buludi mu lufu. S'ncyà bushuwa. Aci kacyèna cìpetangana naaci to.

<sup>162</sup> Dìyi ndidì ne mushinga, Dìyi dya Mukalenge. “Aba bàdi bìndilà Mukalenge.” Eyowa's, mukalenge. Nwamonu's, aba bàdi ne Nyuma wa Nzambi munda mwabo, bàdi bàtàngila mulayi bwa leelu, ne bàtàngila ne bìndila too ne pàdìbo bàCimòna. Dìbà adi bàdi bàmba ne: “Ki Cyôci aci.” Nzambi ùdi ùbàbuulwilaCì.

<sup>163</sup> Bu mùvwà Natànàèlè. Filipò wàkaya kasangana Natànàèlè. Natànàèlè kwambaye ne: “Mpindyewu anji indilà kakese. Ndi mumanyè ne aci ncilayiibwe, kadi nCimòne's.” Nenku pààkaCimònàye, wàkamba ne: “Ki Cyôci aci.”

Mukaji awu kwambaye ne: “Mpindyewu, mèmè ndi mumanyè, nkàadi mutèlèlètèlèje beena tèlòlji bàà mishindu yònsò. Nkàadi mwenze *cikampanda* ne *cikansanga*. Ne nkàadi mubalè Bible, mèmè mwine, ne ndi mumanye ne tudi. . . Kùdi Maasiyà udi ulwa, wíkala mwa kwenza bintu ebi, pa nanku Wèwè ewu udi ne cya kwikala muprofeta Wendè.”

Yèyè ne: “Mèmè ki Yèyè awu.”

<sup>164</sup> Mukaji awu kwambaye ne: “Lwâyi, kanùmonàayi Muntu, ki Cyôci eci.” Wàkindila too ne pàakamònaye Maasiyà awu mumanyishùbwe ku Dìyi dya Nzambi, dîbà adi kwambaye ne: “Ki citùvwà bindile aci, kùkaadi bidimu nkama yinaayi. Katwèna bapetè muprofeta anyi nî ncinyi cyònsò to. S’ki Yèyè ewu, ne Yèyè mwine Udi wamba ne Ûdi Yèyè awu.” [Katupa kàa mukaba wà mēyi munda mutupu—Muf.] “. . . pàtukàayi nùmonè Muntu Udi mungambile bintu bîndi mwenze.”

Kadi baakwidi bôbò bàvwa bàswa kuMushebeya, ne ndekeelu wa byònsò bàakacyènza. Nwamonu anyi?

Kadi kabeena mwa kushebeya Nyuma Wendè leelu ewu nansha. Ncya bushuwa. To, kabeena mwa kuMushebeya to. Ûvwa kaaba aka bwa kutùbweja, pa nanku tudi ne kusakidila. Monaayi mùdi Nzambi munene, byenzedi Byèndè mùdibi binène, mùdici kacìyikù mwa kupangila!

<sup>165</sup> Mpindyewu, Nzambi ùdi ne mushindu mulongolola ne wà ku cibangidilu wà dyenza maalù, ne Yèyè kàadyàkucyènzakù bibèngàngàne ne cyôci aci to.

<sup>166</sup> Mpindyewu Yèyè mmulaye mu matuku a ndekeelu bìvwàYe mwa kwenza. Ne nCibitùme, citùtùmìne Mukenji; ne Mukenji ewu ùvwa mwa kwikala ne dimanyishibwa dimwedimwe divwà naadi Eliyà adi, mùvwà Elishà naadi, mùvwà Yone Mubàtìiji naadi amu. Ne Cìvwa mwa kukùdimuna myoyi ya bantu, kî nkuyitàngija ku dingumba to, kadi kuyààluja kùdi baataatù bàà ku cibangidilu, bapostolo, kuyààluja ku Dìyi. Mushindu mwine wùdi bintu ebi bishindika’s wè! Mushindu mwine wùdi mu dyela dya mpungi wa mwanjelo wa ndekeelu, Bwàkabuulwibwà 10: “Mu matuku a mwanjelo wa mwandamutekete, maalù masokoka aa àdi ònsò. . .”

“Ba-Méthodistes bààkenza *cikampanda*, ne ba-Baptistes, ne église de Christ, ne ba-Témoins de Jéhovah, bònsò bàdi bènza *cikansanga* bwa cinyi?”

“Maalù masokoka awu neàbuuludiibwè mu dituku dya ndekeelu, piikalà wà mwanjelo wa mwandamutekete. . . Mukenji wà mwanjelo wa mwandamutekete, piikalàye. . .” Kî mpààbangàye kwenza cyôci eci to, kadi: “Pààbangàye kukòbola Mukenji wèndè.” Nwamonu anyi? Kî mmu bidimu bya didìlongolola abi to, kadi: “Pààbangàye kukòbola Mukenji, maalù masokoka aa dîbà adi neàbuuludiibwè.” Kadi’s ngòwò aa; ncìvwa mubimanyè to, ne nwènù nudi bantemu bàà cyôci aci.

<sup>167</sup> Ne pashìishe mu nzubu munene wa dijoojela wàwa, bwa bàà pa buloba kabìikadi, bàcìdi anu bàdyèla nkonko pa cìdi cyenzèke. Mu Tucson, nzubu minene ya dijoojela ayi mmicìkwàte fòtò muulu mwàmwa; bàcìdi anu bàdyèla nkonko pa cìdi cyenzèke. “Ncinyì aci?” Bàcìdi anu bàfunda mu cikandakanda ne: “Kùdikù muntu udi mumanye cintu kampanda pa bwalu ebu, mùdìci cìfwànyine kwikala cyenzèke anyì?” Kakùtu difwima muulu mwàmwa to, kamùtu kapeepà, kamùtu mutaleela to; mu butùmbùke bwa kilòmèètà makumi anaayi ne mwadamukulu mu mpepele. Kaa, ekelekele!

“Nekwikalè bimanyinu mu dyulu lwà kuulu. Kadi pènzekà bintu ebi, dikanka dya buloba mu myaba mishìilèshìilàngàne, pashìishe nekùmwenekè cimanyinu mu dyulu, cya Mwànà wa muntu.” “Mu dituku adi,” mu Luukà, “Mwànà wa muntu nèàDìbuulùlè cyakabidi; munkaci mwa kubuuludiibwa, Yèyè mwine.” Ne buloba nebwikalè ne mmwènekèlu wa Sodomà ne Gomolà. Kaa, ekelekele!

Bànà beetu, kanùpangi kumanya bintu bya nyuma to, nwamonu’s. “Kenkètaayi Mifundu, bwalu mu Yòyi mmunùdi nwela meeji ne Cyendelele, ne nudi ne Mwoyi wà Cyendelele; kadi Yòyi ayi’s ki Yìdi yìfila bujaadiki bwa Dìyi.” Yòyi ki Yìdi yìfila bujaadiki bwa Bulelela, bintu bìdi Nzambi munkaci mwa kwenza mu dîbà edi abi.

<sup>168</sup> Kadi ncinyì mpindyewu? Aba bàdi ne Nyuma wa Nzambi, mbindile byòbì bintu ebi. Ne pàdìbo bàmona bintu abi, bàdi bìitabuuja bintu abi. Yesu wàkamba ne: “Muntu nansha umwe kèna mwa kulwa kùndi Mèmè pàdi Taatù Wanyi kàyi mumukòke to. Ne bònsò bàdi Taatù muMpèeshe,” Yèyè ùdi Dìyi, “nebàlwe kùNdi. Nebàlwe kùNdi.”

<sup>169</sup> Ndi mutàmbe kwikala mukolèshe dîyi mu dinda emu, nwamonu’s. Aba bàdi bìndila Mukalenge, munkaci mwa kwindila; ne pàdìbo bìndila apu, ne bàmona mulayi wà leelu awu, munkaci mwa kushindikiiibwa, cìdi cìvwijulula diitabuuja dyabo dipyadipyà mu Dìyi Dyèndè. Bwalu, Yèyè mmulaye bwa kucyènza, kadi’s ki kucyènzaYè eku. Dîbà adi kakwèna mpatà to. Nzambi ùtu wàkula. Dìyi Dyèndè, dyambedi, dùtu dyàkula. Ne pashìishe Nyuma udi uDitwàla awu ùdi wènza cintu cìdi Dìyi dyambe ne neDyènzè aci.

Kaa, tudi ne matentula búngì cyanàànà. Netùtungunukè anu ne kwikala naawu, bantu bàà mwoyi ya meeji matòoke bàteeta bwa kwenza bintu mu mushindu *kampanda* ne mu mushindu *kansanga*, kadi tàngilààyi nùmonè cyàkenzekà aci. Bantu nebèlè byanza, ne dîbà adi—dîbà adi nebàfwe. Nwamonu’s, monaayi.

<sup>170</sup> Cilukabatà cya dingumba cya muntu nansha cimwe kacýàkukùmbanaku to, kuvwija kwa bidimba bwa mishèètè yabo ya cipungidi ya cyena-mangumba midìkwàtakajila ayi.

Kacya Nzambi kâtukù ne dingumba to. Yèyè kààdyàkwikalaku ne dingumba to. Dyôdi diine's ncintu cikwàtakaja kùdi bantu.

<sup>171</sup> Kadi ndi ndikonka, leelu ewu, byônsò byetu bya dikòkà dya bantu ne bibilù binène bya butangadiki ne matàbuluja abi, ní katwèna baditwe mu dyuja dya mushèètè wà cipungidi wà ba-Mìthodistes, mushèètè wà ba-Baptistes, mushèètè wà ba-Presbytériens! Kadi bishi bwa Mushèètè wà cipungidi wà Kilisto, Dîyi adi?

Ne pìikalàbi bikèngela bwa Mukaji-musela ikalè Dîyi, dîbà adi's bìdi bikèngela bwa kwikalaYe wa Kilisto, citùpà cya Mubaki. Bìdi bikèngela bwa kwikalaYe Dîyi; Dîyi adi kadiyi dya dituku Dyèndè Yèyè to; Dîyi dya dituku edi, dyàkalayàYe ne nediiikalè dituku edi adi, didiYe mutùme Dîyi Dyèndè bwa kufwimba Mukaj'Èndè-musela ne kuMupèèsha mbùngakeenu. Ndi ntekemena ne tudi tucyùmvwà! Mpindyewu kwàngaci mmwènenu webè wèwè, ne kwàngaci mmwènenu wa muntu kampana mukwabo to. Angata Dîyi dishindika edi, Bible. Dyôdi ndidi dyàmba.

Nzambi mmulaye mu Dîyi Dyèndè mushindu wùvwàYe mwa kusungula Mukaj'Èndè-musela mu dituku dya ndekeelu edi. Nukààvwakù bamanyè nanku anyi? Yèyè mmucilayè, mùvwàYe mwa kucyèna, ne ciine aci ku ndongamu Wendè wa ku cibangidilu wa kusungula Kilisto, wa kusungula bikondo, kusungula mivù, mùdiYe. . . Yèyè kèna mwa kucipangila to, pa Mukaj'Èndè-musela, bwalu Yèyè ewu ùdi citùpà cya Dîyi.

Kèna mwa kuCisungwila ku dingumba to, bu mùvwàbi ne Kààkasungwila Kilisto ku dingumba. Kilisto wàkalwa kùdi dingumba anyi? Wàkalwila ku dingumba anyi? To. Bòbò bààkaMubènga. Ee, cyôci aci ki cìvwà dingumba dyenze musangu awu. Pashìshe pàdiYe ùsungula Mukaji-musela, Ùdi mwa kulwa mu mushindu mukwabo kanà wònsò anyi?

Yèyè wàkafikisha Kilisto pànu bishi? Ku Dîyi dya baprofeta. Ncya bushuwa anyi? Neàfikishè Mukaj'Èndè-musela pànu bishi? Ku Dîyi dya baprofeta.

Yèyè wàkaMumanyishisha bishi pàakalwàYe apu? Ku muntu mwikàle ne nyuma wa Eliyà pambidi pèndè, mupàtùkile mu cipèèla. Yèyè neàmanyishishè Mukaj'Èndè-musela bishi? Yèyè mmulaye mu Maalàki 4 cintu cimwecimwe aci, kumpala kwa kubùtulaYè buloba, mwàkadibi mu matuku a Sodomà.

<sup>172</sup> Vùlukàayi ne, Sodomà wàkooshiibwa. Ncya bushuwa anyi? Ee, bikèngela buloba ebu bwòshiibwè. Yesu wàkamba nanku. Ne nekùlwe cikondo, cya ne, bu mùdi Luukà nshapita wa 17 ku mvensa wa 30 mwambe ne: "Mu matuku ikalàbu bushàale bu Sodomà ne Gomolà, dîbà adi Mwànà wa muntu ùvwà ne cya kubuuludiibwa."

Ne pashìshe ncinyi cìvwà mwa kwenzeka? Bilondèshile Maalàki, Yèyè neòshè cyakabidi buloba, ne baakàne (mu



Bukalenge bwa bidimu cinunu) nebàpatukè bènda bèndela pa butù bwa beena lwonji. Ncya bushuwa anyi? Nwamonu anyi?

Pa nanku tudi ku cikondo cya nshikidilu mene. Tudi basòmbe mwab'ewu ku ciibi mpindyewu, bindile bwa kulwaYe.

<sup>173</sup> Monaayi ne, Nzambi mmulaye mu Dìyì Dyèndè ne Yèyè ùvwa mwa kusungula Mukaj'Èndè-musela ku mushindu Wèndè wà ku cibangidilu wàkasungulàYe Wèndè. . . Mubaki awu. Wàkadyànjila kucyàmbila ku baprofeta, ne kutùmaYè muprofeta bwa kucimanyisha.

Muprofeta awu pàvwàye mwimàne ku mwelelu wà Yadènè, wàkamba ne: “Monaayi!”

Bòbò bàvwa bàmba ne: “Wèwè udi Maasiyà awu, kì mmwômò anyi?”

Yèyè ne: “To, mèmè ncyèna Maasiyà awu to.”

“Wèwè udi ne cya kwikala anu Maasiyà awu.”

<sup>174</sup> “Kadi mèmè ncyèna Yèyè awu to. Kadi Yèyè awu mmwimàne munkaci mwenu amu. Ne bisabaata Byèndè, mèmè ncyèna mukùmbànyìne kusùùlula nshinga yàbì to. PàälwaYe, neàDimanyishè. . .”

Kadi leelu Yèyè mmwimàne munkaci mwetu emu, mu Mupersona wa Nyuma Mwímpè, mutùngùnùke ne kuDimwènesha, ùbwela mu Ekeleeziya Wèndè, mwikàle ùDimanyisha; bwalu, Yèyè, ne Mukaji-musela ne Mubaki nebìikalè cintu cimwe, mwikàle ùDimanyisha. Ne dīngà dituku neùmònè ne Ewu ùvwa umvwa mu mwoyi webe, ne umòna dimanyishiibwa Dyèndè awu, neälwe muntu musungùlùke kumpala kwebe, dībà adi wèwè ne Yèyè nudi Umwe.

Nudi basanga kùdì Dìyì. Ne Dìyì, òvwa ku cibangidilu adi, nedyàlukilè cyakabidi ku cibangidilu, didì Nzambi adi. “Ne mu dituku adi nenùmanyè ne Mèmè ndi munda mwa Taatù, Taatù munda Mwànyì; Mèmè munda mwenu, ne nwènù munda Mwànyì.” Aleluuyah! Twàfikimu. Aleluuyah! Mèmè ndi ne disanka dyàbùngì dya kuMumonà wàngata mubidi wà buntu munkaci mwetu mene, ne dya kumona cyàkalayàYe bwa Dìyì; kacìyì cidì disaluka dya muntu kampanda, dimba dya misambu, ditùpika, ne dija dya maja to. Kadi ku Dìyì Dyèndè, amen, Yèyè ùdi ùDimanyisha.

<sup>175</sup> Tàngilàayi, pàakatwàlào, kwasabo ntempelu ne kulwamù ne mushèètè wà cipungidì awu, Nzambi's wàkabwelamù ne Dikunji dya Kapyà. Amen. Ùvwa n'Davidì ùtùpika, wèla mbila mikole, bàvwa mbimbi bònso bàà misambu ne baakwidi bènta bikàsà, pàvwàbo bapàtùke mu diswa dya Nzambi apu. Kadi pààkalwà Nzambi kumanyisha mushèètè wà cipungidì mu mwaba ne citèèkelu Cyèndè Yèyè, kumpala kwa kufikishabo mushèètè wà cipungidì awu muntwamu, s'ki Dikunji dya Kapyà dilwalwà dyènda dìleeja njila edi, dipweka buludi kumutu kwa

mapwapwa a bakèlùbà, ne paanyima mene pàà Mwaba mutàmbe Cijila, ciikishilu Cyèndè; Dikunji dya Kapyà's! Ne butumbi bwa Nzambi bùvwa muntwamu, mu mushindu wà ne munt- . . . kabàvwa nansha mwa kumona mwa kukwàta mudimu to. Amen.

S'neCìfomijè mèsù a mwena tèlòlòjì yònsò, pààvwilàYe Mukaj'Èndè-musela. Yèyè ewu neàngaciwbè muulu munkaci mwa—mwa bufuku, mutùdi mwa kwamba's, bwàbò bóbò. Kabàakumòna nansha pààyàYe apu to. Kaa, butumbi bwikalè kùdi Nzambi's wè!

<sup>176</sup> Monaayi, Nzambi mmulaye ne Yèyè neàpatulè Mukaj'Èndè-musela, civwàYe mwa kwenza. Kùvwa mwa kwikala Dimiinu kampanda. Kùvwa mwa kwikala Bukènkè ku ibaamulòòlò, mùvbwàYe mwa kwenza bintu byònsò ebi, anu mu byòbì, ne ku mushindu wàkacilongolòlòYe mu Dipungila Dikulukulu ne mu Dipungila Dipyadipyà.

Ne kí nku dingumba nansha. Kí nkù ndongolwelu wetù utùdi tukwata nendè mudimu leelu ewu nansha. Twètù tudi tukeba anu lufu cyanààna. Bantu bàteekèPu anu byanza byabo, kadi bàfwe ku dyenza nanku. Nwamonu anyi?

<sup>177</sup> Dìyì, Mukenji wà dilòòlò, wùdi ne cya kutwàla bipeta bya dilòòlò. Mukenji wà dilòòlò wùdi ne cya kumyamina Dimiinu dya dilòòlò, kí ndimiinu dya mu dinda to. Dimiinu dya dilòòlò! Ncya bushuwa anyi? Cyalu cya mu nkànkala, mamiinu ààci musangu awu, àvwa ndingumba; dyàkafwà, dyàkabùtuka. Kadi Mukenji wà ibaamulòòlò newùleejè Bukènkè bwa ibaamulòòlò, newùleejè bipeta bya ibaamulòòlò; Mukenji wà ibaamulòòlò!

Cikondo cya Yesu, mukenji wà mu nkànkala, wàkaleeja bipeta bya mu nkànkala. Mukenji wà ku cibangidilu wàkaleeja bipeta bya ku cibangidilu, wàkenza bufùki. Yèyè wàkenza Mwan'Èndè mu cimfwànyì Cyèndè Yèyè mwine, mu nkànkala. Ku ibaamulòòlò Yèyè ùdi wènza Mukaji-musela bwa Cyòci aci. Nwamonu anyi? Ku cinyi? Ku Dìyì Dyèndè.

Yèyè wàkenza buloba munyì? Mmunyì mwàkabwàkulàYe pààbù kwikalakù? Ku Dìyì Dyèndè!

Mwan'Èndè ùvwa nganyì? Dìyì! “Ku cibangidilu kwàkadi Dìyì, ne Dìyì dyàkadi ne Nzambi. Ne Dìyì dyàkavwijiibwa mubidi ne dyàkasòmbela munkaci mwetu.”

Mmunyì mwàngatàYe Mukaj'Èndè-musela? Ku Dìyì; kí nku ditempu dipyadipyà to, kí nku mmwènenu wa mwena tèlòlòjì kampanda to. Kadi mbilondeshìle Dìyì Dyèndè mwàMumanyishàYe. Nunku kùsakididiKù kantu nansha kamwe anyi kùumushidiki kantu to. Ù'Dilekèlè anu mùdiDi amu. Nwamonu anyi?

<sup>178</sup> Ku ibaamulòòlò, Yèyè mmulaye ne Ùvwa mwa kubuulula, nansha nanku, kukàngula Bitampi Mwandamutekete ebi ne kuleeja bìvwà ekeleeziya ayì mipangile musangu

awu. Bwàkabuulwibwà 10, ne Maalàkì 4, Luukà 17.30, Yèyè mmwambe ne Ùvwa mwa kucyènza. Mpindyewu katùcibwejàkàjìku to. Tùcìlamààyi anu mushindu awu.

<sup>179</sup> Ngánjì, bwa kujikija . . . Tukaàdi twipacila, pabwìpì menemene ne díbà dikumi ne ibidi kushààle tusunsa dikumi ne tutaanu. Njikijè, mu kwamba nunku.

Balunda bàànyì, tèèlajààyi, mu Dìnà dya Mukalenge Yesu! Bintu ebi mbitàmbe kutòoka bwa kanùlu kupanga kuCìitabuuja to. Mbitàmbe kutòoka bwa kanùlu kupanga kuCìmòna to. Ncya bushuwa ne nudi mwa kumona Cyôci aci! Ncya bushuwa ne bàà pa buloba mbafwànyìne kuCìmòna! Kadi anu wenù . . .

Kanùpecikù bwenzeji bwa kùdì bilengejanganyi bipyabìpyà ne bintu bìdìbo naabi leelu ewu ebi to; muntu nansha yèyè mwímpe bìshi, nansha yèyè ne meeji matòoke a bìshi. “Bòbò kabàyi bàakula bilondèshìle mikenji ne baprofeta to,” mùdì Bible mwambe, “kakwènakù Mwoyi munda mwàbò to.” Nwamonu anyi?

<sup>180</sup> Davidì ùvwa wèla meeji ne ùvwa mu bulelela. S’ùvwa ne meeji matòoke. Baakwidi abu bàvwa bèèla meeji ne bàvwa mu bulelela. S’bàvwa ne meeji matòoke. Kadi bààkapanga anu kukonka Mukalenge pa bwalu abu. Ne bòbò bàvwa bafwànyìne kwikala bacyènzè munyi? Pàmwäpa bàakamba ne: “Tudi basambile bafwilekù.” Kadi aci kacìvwa mushindu wà Nzambi wà kucyènza nansha. Yèyè mmulaye ne Kävwa mwa kwenza cintu nansha cimwe Kàyi mwanjì kuCìbuulwila dyambedi basadidi Bèndè baprofeta to. Kadi’s nyawu kùvwa Natànàèlà mwimane munkaci mwabo mene amu, kadi kabàakamukonkaku to nansha kakese.

<sup>181</sup> Mpindyewu nùbalààyi ndambu wa nshapita ya Kulondolola yidì yilondà ayi, nenku nenùjandulè. Davidì pàakasòmbàye mu nzubu mwèndè, ne kwambaye ne: “Mbìmpè anyi,” ne Natànàèlà ùvwa musòmbè nendè, “bwa mèmè ewu, kwikala musòmbèle mu cèdres, pàdì—pàdì mushèètè wà cipungidi wà Nzambi mu ntentà pambelu apa?” Nenku Natànàèlà, kupetaye kùdì Mukalenge, cya dimwambila bwa kwenzaye.

<sup>182</sup> Kadi yèyè ùkaavwa mumane kwenza cilèma, ki pashìishe Nzambi kwamba ne: “Ambila musadidi Wanyi Davidì ne Mémè ndi mumunange. Ndi mumupè dìnà bu dya bantu banene bàà pa buloba, kadi Ncyèna mwa kumulekela ùcyènza to,” nwamonu’s, “yèyè mmumane kuNgeela màyi ku makàsà,” wamonu’s, “Ncyènà mwa kumulekela ùcyènza to. Nèntwalè muntu, mwanèndè wa balume, yèyè neàjuulè nzubu wa kashidi wa Nzambi.” Nenku awu ùvwa n’Davidì’s, mu bushuwa bwa bwalu. Bidi ne, Solòmò ùvwa cifwanyikijilu cya cyôci aci, kadi pashìishe yèyè wàkapangila. Muntu yònsò ùdi ne cya kupangila. Muntu wetu yònsò ewu ùdi ne cya kupangila.

Nzambi ki Umwepele udi kàyi mwa kupangilakù to. Yèyè kèna mwa kupangila to. Aci ki cintu cimwepele cidi Nzambi kàyikù mwa kwenza to, nkupangila. Ne Nzambi ùdi Dìyì. Ne Dìyì, nansha bimwèka bu ne cintu necilwilè njila mukwabo ewu, necilwilè anu menemene njila udi Dìyì dyambe awu.

<sup>183</sup> Mpindyewu vùlukàayi ne, bidi bikèngela ùlondè movù, dībà. Nwamonu anyi? Ne movù wùdi usanganyii bwamù, dībà, enza bwa aci cishindikiibwè, bwa kumona ne cidi menemene anu Bulelela.

<sup>184</sup> Mpindyewu angàta bintu byònsò bidì ne cya kwenjiibwa ebi, Dìyì dyònsò, bifwànyikijilu byònsò, ne bintu abi, ùtangilè mwaba wùdi usanganyii bwa. Elàngànaayi meeji pa dībà ditùdi ne mwoyi.

Tàngilàayi kuntu kwàka, pamwe ne cyàdiikumi cimwe cya buloba aci cidi pabwìpì ne kutùkina mu màyi. Maalu a mamanya ngàdi àmba nanku. Bàdi bàtàngila ku ntankù. Kùkaadi ndambu wa bidimu, bàvwa bambe ne: “Nkushààle anu tusunsa tusatu cyanàànà mpindyewu bwa mundankulu.” Ncifwànyine kwikala kasunsa kamwe, ncifwànyine kwikala cyabibidi cìmwe cya kasunsa patùdi twakulangana apa.

Kwambabo ne: “Kacyàkwenzeka mu lwetu lukòngò elu to.”

<sup>185</sup> “Ncifwànyine kwenzeka mu tusunsa tutaanu emu.” Kadi monaayi cintu cyàkalondà cyàkambàye: “Bidimu bitaanu.” Mpindyewu awu kì mmémè udikù mwambe aci to. Yèyè ngudi mwambe nanku, yèyè mwena maalu a mamanya awu. Ki kumwangalabo mu Californie eku byenzè bu njiji. Nwamonu anyi? Ee, dituku dyàkapàtukà Lotà mu Sodomà, dituku dimwedimwe adi kwàkalòka mvula wa kapyà pa buloba.

Dimwe dya ku matuku àdi panshi aa Nzambi neàngatè Mukenji wètù ewu, ne twètù netùùmukè pànu. Cintu kampanda ncyènzekè, cya bushuwa menemene, dībà adi, pìikalà Ekeleeziya muye, Mubidi Wèndè, Mukaj’Èndè-musela.

<sup>186</sup> Mpindyewu ndi muswe kunùbadilakù Mufùndù kampanda. ne ndi muswe nùWùbalèku pamwe naanyi. Ndi muswe nùbuululè mu Dutèlònòmà 4, bwa kujikija. Ngeela meeji ne pàmwàpa bintu búngì bukùmbàne mbimane kwambiibwa, bwa nwamòna mwa kuumvwa. Dutèlònòmà 4. Nèmbalè myaba yibidi mwômò emu.

Nenku bwa ekeleeziya ewu, ne bwa batèèleji bàà mikaba ya mēyi, bantu bàdi batèèjā mikaba, ne bantu bàdi batèèlejilā ku nshinga mu bitùpà bikwabo byònsò bya ditunga, ndi muswe bwa nùteelejè cyôci eci ne ntema yònsò, ne kanùpangidikù to. Eci ki cintu cìndi. . .

Dutèlònòmà, nshapita mwi4. Nèngàngatè mvensa wa kumpala. Ndi muswe kubala mvensa wa kumpala, pashiishe nèmbalè mvensa wa 25 ne wa 26. Nudi mwa kucibala cyònsò

panwikalà bafikè kumbelu; kadi ng’anu, mbwa kulaminyinaku dībā, bwa twamònakù mwa kupátuka pa dībā, bwalu bidi binkèngela bwa mèmè kwàlukilè cyakabidi dilòlò edi, bu Mukalenge mwa kwanyisha. Tèèlejàayi muprofeta ewu mùdiye wàkula. Úkaavwa mu Bwikadi bwa Nzambi. Yèyè ùvwa mumanye civwàye wàmba aci. Tèèlejàayi.

*Mpindyewu ki bwa cinyi tèèlejà, Wèwè Izaleela, mèyi ne mikandu, bìndi nkulongesha, bwa wèwè kubyènza, bwa nwènù kwikala ne mwoyi, ne kubwela ne kukwata buloba bùdi MUKALENGE Nzambi wa baataatù beenu ùnùpèèsha; (Aci ncifwànyikijilu cya Bukalenge bwetu bwa bidimu cinunu.)*

*Kanùsàkididi ku dîyi dîndi nnùfùndila, anyi nwènù kanùumushidikù kantu to. (“KanùsàkididiKù kantu nansha kàmwe, ne kanùumushidiKù kantu nansha kàmwe to. Shààlaayi, ambàayi anu cidiCi cyàmba aci!”) bwa nwamòna mwa kulama mèyi matùma a MUKALENGE Nzambi wenù àndi nnùfùndila:*

*Mèsù enu àmònu cidi MUKALENGE mwenzè... kùdi Baalà-peòlà aci, bwalu bantu bònsò bàvwà balondè Baalà-peòlà abu, MUKALENGE Nzambi webè wàbàbitulu munkaci mwenu. (“Mpindyewu nudi cisambà citàpùlùke, pambelu pàà mangumba awu.” Nwamonu anyi? Nwamonu anyi?)*

*Kadi nwènù bàdi bashààle balamàte kùdi MUKALENGE Nzambi wenù abu, nwènù nudi ne mwoyi muntu ne muntu wa kunùdi leelu ewu. (“Kanwènaku bafwè ne dingumba dyenu to. Nudi ne mwoyi mpindyewu, ne mu Bwikadi bwa Nzambi.”)*

Ikàlaayi ne ntema, eci kacinùpici to. Mvensa wa 25, mpindyewu, pàdìbo bàbwela mu buloba amu, mpindyewu tàngilàayi nùmonè cidi cyenzèke.

*Nenku pawàlèlè bânà, ne bânà bàà bânà beebe, ne nwènù... bashààle ntàntà mule mu buloba amu, ne badikooyishe (s’ki cyàkenzekà), ne benzè... bimfwànyi bisonga (cintu kampanda cikwabo), anyi cya mu cifwànyikiji cya cintu kanà cyònsò, ne nwènù benze bubi ku mèsù kwa MUKALENGE Nzambi webè, bwa kumukeba ciiji, (Tèèlejàayi!)*

*Ndi ngangata mauu ne buloba bu bantemu bwa kunùpiisha leelu ewu ne, nwamonu’s, nwènù nenùbutukè anu butùbutù ne lukasa lwònsò mu buloba abu, anyi mu mwaba awu, munùdi nuya bwa kakwàta dyàmwàmwà dya Yadènè abu; kanwàkuleepeshamù matuku enu to, kadi nwènù nenùbutudibwè anu butùbutù.*

<sup>187</sup> Ewu ùvwa m'Mòsà wàkula ne Izaleela, paanyima pàà yêyè mumane kushindikiibwa kùdì Nzambi, ku Dikunji dya Kapyà, ne mumanye ne ùvwa mujaadikiibwe ne mmusadidi wa Nzambi bwa kubalombola bwa kupatukabo. Nenku kumpala kwa kubwelabo mu buloba abu, kumpala kwa kubwelabo, Mòsà wàkamba ne: “Mpindyewu, mèyi àngánwàmbìdì awu, ndi ngangata dyulu ne buloba bu bantemu bwa kunùpiùsha. Nwènù basàkìdìlèKù kantu nansha kàmwè, anyi buumùshìlèKù Dìyì nansha dimwe, kanwàkushààlakù mu buloba bùdì Mukalenge Nzambi ùnùpèèsha abu to.”

Ki mûndì ngamba pàànyì, mu Dìnà dya Yesu Kilisto: Kanùsàkìdìdì kantu to, kanwàngaci, kanwèdìMù meeji enu nwènù to, ambààyi anu cìdì cyamba pa mikaba ya mèyi ayi, enzààyi anu menemene cìdì Mukalenge Nzambi mutùme dìyì bwa kwenza aci, kanùsàkìdìdìKù kantu to.

<sup>188</sup> Yêyè misangu yònsò, ùtu anu ùshààla mukwate ku mulayi Wendè kutùdì. Mulayi wònsò wùkaadiYe mwenzè, Ùtu mushààle mukwàtekù. Yêyè ùkaadikù munwàmbìlè bwalu bùvwà mwa kwenzeka, ne bwòbò bwenzèke anyi? Ndi ndwa ne dyulu ne buloba kumpala kwenu leelu ewu, mu kadyòmbò keela: Kacya Nzambi ùkaadikù mwambe bwalu bùdìYe kàyi mukùmbajè ne mwenzè anu menemene cìdìYe mwambe ne Ùvwa mwa kutwenzela anyi? Yêyè kàtukù mucyènzè anu mùvwàYe mwambe ne Ùvwa mwa kucyènza anyi? Aci's mmenemene. Ki mwàtùngunukàYe ne kucyènza. Cibi kanùKùsàkìdìdì to. KanùKùmùshìdì to. NùCitàbùùjaayi anu cyanààna ne nwèndè badipwekèshe kumpala kwa Mukalenge Nzambi wènu, bwalu twàsemènyì pabwìpi ne diya kabwela mu Buloba abu.

Dìbà adi, kwàkwàlukila, kwàkwàlukila cyakabidi ku mwoyi wà mushindu ewu to. Newàlukilè bu muntu udi kàyi ufwà to. Newàlukilè, piikalà mpekaatu muumùshìibwe, piikalà Sàtaanà muswikìibwe, ne munda mwa bidimu cinunu newikalè ne mwoyi pa buloba ebu bùdì Mukalenge Nzambi webè mukupèèshe. “Bwalu bapòlè nebàpyanè buloba.” “Wa dyakalenga ngewu udi wenza mèyi Èndè matùma ònsò, bwa wàmòna mwa kupeta bukenji bwa kubwela mu Cimenga.” “Bwalu pambelu pàdì beena buloji, beena mashimi, bendi bàà ne bandumba, ne mbwa. Bòbò kabààkubwelamù to.” Kadi bìdì anu bwa Bapikula, ne bwa aba bàdì bènda mu mèyi Èndè matùma.

<sup>189</sup> Kwàngacikù cintu kampanda cya cipyacìpyà to. Bìdì bìpèèpuka myaba yònsò, ne nekùlwe kabidi bikwabo byàbùngì. Kadi kwàngaci bintu bipyabìpyà ebi to.

Mukalenge Nzambi webè wàkwambìdì cìdì Bulelela. Mukalenge Nzambi webè wàshìndiki cìdì Bulelela, ku Dìyì Dyèndè ne ku Nyuma Wendè. “Kì nku bukole, kì nku makàndà, kadi nku Nyuma Wanyì.” Nenku, Nyuma: “Nzambi ùdì wènda ùkèbangana ne aba bàdì bàMukuukwila mu Nyuma ne mu

Bulelele.” “Díyì Dyebe m’Bulelela.” Ne Yéyè wáshindikì mu kaabujimà ne Yesu Kilisto ùdi umwèumwè awu makeelela, leelu, too ne kashidi. Yéyè wàkuleeji Mamiinu a dilòòlò. WàkubuulwidìWu, mu Díyì. WàkujaadikìdìWu, ku Nyuma Wendè.

<sup>190</sup> Kùjuulukù anyì kùteecikù bulongolodi nansha. Kùteecikù bwa kwibakila pa nì ncinyì nì ncinyì cikwabo to.

Kadi shààla mudipwekèshe kumpala kwa Mukalenge Nzambi webè, bwalu mbimwèke anu bu ne biibi bidi mwa kukanguka bwa twètù kubwela mu Buloba bulaya abidi àdi panshi aa. Dìbà adi túbwelèmu twenda twimba misambu milelela ne dicyònkómoka, pàngàta Mukaji-musela ne Mubaki kaaba kààbò ku Nkwasa wa butumbi.

<sup>191</sup> Ikàlà ne nsòmbelu wa didipwekesha. Ikàlà ne nsòmbelu wa dinanga. Nùnganganè muntu ne mukwèndè. Kanùpecikù bwalu munkaci mwenu to. Wèwè mumone cintu kampanda cya cibi cijuuka mu mwoyi wèbè bwa muntu mukwabo, cyùmùshèmu anu mwaba awu. Kùlekedì . . .

Ne Sàtaana neñzè ne mwèndè mwònsò bwa kubwela munkaci mwenu. Nwamonu anyì? Kanùlekedì aci cyènzeka to. Muntu kampanda wa làbàlàbà mmufwànyine kulwa ne kuteeta bwa kukulalula wèwè kuya kule naaCi. Nudikù nwela meeji ne bàvwa mwa kuumusha Mòsà mu Bwikadi bwa Nzambi ku miyiiki, mùkaavwàye mwimanèèmàne ne muCimònèmòne amu anyì? To, mukalenge. To. Katwèna tuumushilaKù anyì tusàkìdilaKù to. NùCìlamààyi anu mùdì Mukalenge mwambe amu. Katwènakù baswè bya dingumba abi to. Katwènakù baswè bya malongolodi abi to. Katwènakù baswè budimu to. Katwènakù baswè bya dikokangana to. Tudi baswè Nzambi, ne Yéyè ùdi Díyì.

Mpindyewu twìnyikààyaaku mitu yetu.

<sup>192</sup> Éyì Nzambi, ndi ntàngila nseke yònsò ne dísù dya nyuma, ndi nteeta kumona cìdì munkaci mwa kwenzeka. Ndi mmona Díyì Dyebe, mùdìDi dishindikìibwe, mùdìDi dijaadikìibwe; kacya anu kùkaadi bidimu makumi asatu ne bisatu, ku musulu eku, ciWàkambà aci. Kadi’s ki cyòci eci, bidimu makumi asatu ne bisatu pashìshe, ne Wèwè udi munkaci mwa kwenza anu cyÚvwà mwambe. Ne Údi mwenzè anu cyÚvwà mwambe. Mukalenge, kabitwènzèkèdiku bwa kuteeta kuCìvwija citàmbe bukesè anyì kuteeta kuCìvwija citàmbe bunene to; tùCìlamè anu mùdì Wèwè muCyènzè amu, twenda anu badipwekèshe ne tuKulonda munyima.

<sup>193</sup> Aba, Mukalenge, mbaùdi Wèwè mufile ku mudimu wà bwambi ewu, pa kuumusha bònsò bàdì balààle mu ditunga dijimà abu, pa buloba bujimà. Nkita ya muneemu emu mmilame bààbúngì bàdì bindile, bansantu babèneshìibwe abu. Kadi bìdi anu mùdìbi byambiibwe ne: “Twètù bàdì ne mwoyi ne bashààle

katwàkupangisha aba bàdi balààle to. Mpungi neàdilè, bafwè nebàjuukè dyambedi; pashiishe netwàngaciibwè muulu pamwe naabo.” Pìikalà butumbi bwa Nzambi pa buloba, nebùsokokè Ekeleeziya ku mèsù kwa bàà pa buloba. KabààkuMumòna mene to pààyàYe.

<sup>194</sup> Taatù Nzambi, lamàku aba nunku mu byanza Byebe. M’Beebe Wèwè. Ndi ndòmba, Nzambi, bwa twikalèku misangu yònsò anu twenda badipwekèshe kumpala Kwebe. Katwèna bamanyè ne ntoo ne ku dībà kaayi to. Katwèna tujinga kumanya ne ntoo ne ku dībà kaayi to; aci kī nciitùtàngile twètù to. NciKutàngile Wèwè. Kī ndiswa dyetu twètù dya kumanya ne neŪlwe dībà kaayi to. Ndiswa dyetu, Mukalenge, dya kutungunuka ne kwikala badipwekèshe too ne piine paWàlwa apu, ne kwenda Neebe. Ndiyinga dyetu dya Wèwè kuDilekela anu umanyika, ku musangu ne ku musangu, Taatù, munkaci mwetu, bwa twikalèku mwa kumona ne tucidi anu twenda Neebe.

<sup>195</sup> Tùfwilèku luse ku mpekaatu yetu yikaadi mipite. Tùludikèku ne tùlamèku ku buteyi bwònsò bwa dyabulu, bwa matuku àcilwalwà. Tùlombòlèku ne tùludikèku, Èyi Nzambi Taatù wetù. Tùfwilèku luse ku mpekaatu yetu ne tükwàcishèku bwa kwikala bàna Beebe. Twètù tudi cipidi cya bantu bapele. Tudi bantu biipata, kùdì tusùmbù twa bantu tusungùlùke twa bàà pa buloba ebu, kùdì mangumba a maeeleeziya.

Tudi tumona ndekeelu. Ne tudi tuKwela twasakidila bwa lumònò lwa nyuma mu Dìyi Dyebe, bwa kumònakù cikondo cya nshiikidilu, bwalu bintu byònsò ebi bìdi ne cya kuya kwobeka ku dyashiibwa dya mabwe dya difùmina mu Dyulu. Tükwàcishèku, Mukalenge, bwa katwikadi panwapa mu dituku adi to, kadi twikalè bakabwelè mu Bwikadi Bwebe, tupaapalè tükabwelè mu cyàdi Cyebe.

<sup>196</sup> Ondòpàku babeedi ne beena ntatu, Mukalenge. Tudi tulòmba ne dilòlò edì Ûtùpèèshèku disangisha dilenga dya menemene, swaku bwa kakwikadi muntu ne butekete munkaci mwetu to, bwa Bwikadi Bwebe, Mukalenge. Swaku bwa myoyi yetu yitungunukè anu ne kwikala mitèèka pa Wèwè. Ne tudi bamanye, Mukalenge, bwa ne mfranga, bubanji, bintu bya pa buloba kabyèna ne mushinga to, bìdi anu bya mubidi cyanààna. Byònsò abi bìdi ne cya kuya. Midimu yetu ya dyanza, mbànza yetu, balunda beetu, byònsò bìdi ne cya kuya. Nansha twètù biikàle babanji, nansha biikàle bapele, nansha biikàle bamanyike anyì katùyi bamanyike, byònsò abi bìdi ne cya kuya. Kadi kùdì cintu anu cimwepele cidi buumùntù bwetu bushindàmèène pànu, ki Yesu Kilisto. Pa nanku, Nzambi, enzàku bwa tuteekè ku luseke byònsò bu ne mbya mushinga mulondèle, ne tùmukwàtè Yèyè. Ne Yèyè ùdi Dìyi. Enzàku nanku, Mukalenge.



<sup>197</sup> Dìyì dishindika dya díbà! Dìyì dishindika dya matuku a Mòsà òvwa n'Yesu. Dìyì dishindika dya dituku dya Yeshàayi, Eliyà, Yone, bònsò abu, òvwa n'Yesu. Ne Dìyì dishindika leelu n'Yesu, umwèumwè awu makeelela, leelu, too ne kashidi. Tùkwàcishèku, Mukalenge, bwa kwitabuuja cyòci aci, kumona cyòci aci, ne kwendelamù. Tudi—tudi tulòmba mu Dinà dya Yesu.

<sup>198</sup> Ne mitu yetu miinyika, ndi ndikonka ní kùdikù muntu mwaba ewu utu kacya mu bulela kàyikù mwanjì kwenza cya cinène, cidi cikumbane mu byònsò. . . Wèwè udi uCìitabuuja, kadi anu kuCìitabuuja cyanààna kí nkukumbàne to.

Mèmè ndi ngiitabuuja ne mukàjàanyi ùvwa nsongàakàjì mwìmpè. Mvwa mumanye tatwèndè, mumanye mamwèndè. Mvwa mumumanye bidimu ne bidimu. Úvwa ne nsòmbelu mululàme. Ndi ngiitabuuja ne ùvwa mukaji mwìmpè, kadi aci kacivwa cyènza ne ikalè wanyì to. Yèyè kàakalwakù wanyì to, yèyè, too ne pàngàakalwà kumwitaba, yèyè kungiitaba.

Mpindyewu Yesu mmuswe kukwitaba. Kwènàku muswe kuMwitaba ne kulwa citùpà cya Dìyì Dyèndè anyi? Pawikalà kùyi mwanjì kwenza nanku to, ne mitu yenu miinyika, ne myoyi yenu miinyika, ndi mutwìshìbwe. . .

<sup>199</sup> Kakwènàkù mwaba apa bwa dibìikila dya ku cyoshelu to. Mèmè ncitu mutàmbe kubiswa to, mèmè mwine. Ndi ngiitabuuja ne Nzambi ùdi ùlwa kùdi anu mwaba wùdi awu. Udikù mwa kwela cyanza muulu, wamba ne: “Mwaneetu Branham, wamvùlukakù mu disambila. Ndi muswe kwenza nanku” anyi? Nzambi àkubènèshè. “Ndi. . .” Nzambi àkubènèshè. Ekelekele, byanza myaba yònsò! “Ndi muswe kwikala nanku.” Nzambi àkubènèshè, mwaneetu wa balume. Àkubènèshè, mwaneetu wa balume; nwènù bònsò, myaba yònsò. “Ndi muswe kwikala nanku.” Nzambi àbeneshè. . . “Ndi cya bushuwa muswe kwikala nanku. Ndi—ndi ncimòna.”

Ee, mpindyewu, tàngilà, wèwè mulunda wanyì, kùdi mwa kwikala kaacintu kampana kakese. . . Pawikalà kùyi nanku to, nanku kùdi cintu kampana cyùdi mushindàmèene pa kuumusha aci. Udi pabwìpì naaci, udi munkaci mwa kucitàngila. Udi mucimòne. Utu ucimòna kùkaadi bidimu, cibànda. Udi ucimòna ciikàle cilwa cibobè mpindyewu. Cyòci ne mushinga wàbùngì bwetu twètù, ne cintu nansha cimwe kaciyi mwa kunenga pa kuumusha Cyòci aci, bwa cinyi kubènga kuumusha anu mpala ku cintu cyùdi utàngila aci bwa kudishindamijila pa Yèyè? Bwalu, mpwilààmambò wa mwoyi wònsò, bikondo byònsò bicilwalwà, n'Yèyè. Kwènàku mwa kucyènza, patùdi tusambila pamwe apa anyi?

<sup>200</sup> Nzambi munanga, pàdi byanza bya balume, bakaji, bânà bàà balume, bânà bàà bakaji, ne bambi mene, pàdibo beelè byanza muulu apa. Bàvwa—bàvwa bàswa kwa—kwamba ne mbaswe

kulwa bashindamijila pa Mukalenge Yesu, kadi bimwèka bu ne kabèèna mwa kucyenza to. Kùdi cintu kampanda ciikàle cìbàkòka mu mushindu *kampanda*, mu mushindu *kansanga*. Ncifwànyine kwikala dingumba kampanda, ncifwànyine kwikala muntu kampanda, ncifwànyine kwikala mpekaatu kampanda, ncifwànyine kwikala cintu kampanda cìdìbo bàsokoka mu mwoyi wàbò. Mémè ncyèna mumanye to, Mukalenge. Wèwè ngudi mumanye. Nansha ciikàle cinyi, swàku mpindyewu mene, Mukalenge, paÙdi ubiikila bakwabo apu. . . Wèwe ukàadi mumane kubàbiikila bôbò. Mbeebe Wèwè.

Nenku paÙcidì ubàbiikila apu, swaku bàsuuluke ku cyôci aci, mpekaatu udi mubàjingile awu, mùdi Bible mwambe. “Tàpulukàayi ne mpekaatu udi utùjingila bipeepele nunku awu, bwa twamòna mwa kunyeema ne lutuulu lwònsò lubilu lùdi lutùtèekela kumpala kwetu, mèsù matàngija (ku cinyi? ku mudimu wètù wà dyenza anyi? ku dingumba dyetu anyi? ku diswikakana dyetu anyi? ku nsangilu anyi?) kùdi Kilisto Mubangi ne Mujikiji wa diitabuuja ditùdi naadi mu Yèyè.” Enzàku nanku, Taatù, bwetu twètù leelu ewu, bwalu tudi tulòmba nunku mu Dìna Dyèndè ne bwa butumbi Bwèndè.

<sup>201</sup> Mpindyewu mBeebe Wèwè, Mukalenge. Enzàaku naabo mùdi Wèwè umòna ne mbikùmbàne amu. Enzàaku neetu mùdi Wèwè umòna ne mbikùmbàne amu. Twètù tudi Beebe. Mu Dìna dya Yesu. Amen.

Ndi muMunange, ndi muMunange  
Bwalu Yèyè wàkannanga kumpala  
Ne wàkampetela lupandu  
Pa mucu wà Kalvariyo.

<sup>202</sup> Nwapùku mwoyi didya dya mundaamuunyà anyi? Nwapùku mwoyi bwa ne bânà ní bàdi bilenga, pambelu pààpa mu kàshinyi, anyi kabèèna bilenga anyi? Nwapùku mwoyi byònsò bikaadi bipite abi, ne bafikè ku dijingulula cinùdi nuumvwa mpindyewu mene aci anyi? Cidi cìdìvwija cintu cya mubidi kumpala kwebe, ku dituku ne ku dituku. Nwamonu anyi? Aci cìikalèku mpwilaàmàmbò wa cyònsò cidiku. Bikwabo bintu abi byùmukèku bìye; byòbì nebibutukè, byòbì biine.

Kaa, wèwè tùngunukà anu ne kuMulonda Yèyè! Nwamonu anyi? Anu mùvwà Elishà wènda ùlonda Eliyà amu, twètù twikalàayi tuMulonda Yèyè. Bwalu tudi ne cya kwangaciibwa muulu, twètù pèètù, dīngà dituku. Tudi bamòne dikalu dya Kapyà dyàkaMupàtulà Yèyè mu lukita adi. Tudi tuCyùmvwu munkaci mwetu mpindyewu. Dīngà dituku yèyè neàsuulule tubalu atu ku bisuku. Netùbandè. Kanwènaayikù baMunange anyi?

Ne wàkampetela lupandu  
Pa mucu wà Kalvariyo.

Kaa, wêwè kwênàku anu mwa kubwita kwîsù ne kuMumona mukùdika kuntu kwàka anyi?

Ndi muMunange, (Nganyì mukwabo ûndiku  
mufwànyine kunanga's?) Ndi muMunange  
Bwalu yêyè wàkannanga kumpala  
Ne wàkampetela lupandu  
Pa mucu wà Kalvariyo.

<sup>203</sup> Musangu wònsò wûndi ngaalukila kwànyì kumbelu, ndi nsangana ne muntu kampanda mmuyè. Ndi mwa kwikala muye munda mwa ndambu wa ngondo, dya ngaalukila, muntu kampanda mmuyè. Ntu anu ngumvwa dibungama musangu wònsò wûndi ndwa.

Dituku adi, mwànà wa balume utùvwà tuyakù nendè mu kalaasa, pâmvwà ngenda mpweka ne musèèsù, kwambaye ne: "Wetwawu, Billy."

<sup>204</sup> Mêmè kumutàngila, kale wàwa yêyè ùvwa mwànà mukese mulenga kwîsù, ne nsuki mifiike ya yibàlakana menemene myela cisàku mitùma paanyima; patùdi twakulangana apa mmitòòke anu bu nêjè. Kale wàwa yêyè ùvwa wènda mululàme menemene; mpindyewu ne difù ditùma kumpala mushindu *ewu*. Mêmè kwamba ne: "Wetwawu, Jim." Mêmè kumutàngila.

Mêmè kudyumvwa mu mwoyi wànyì, kudyàmbidila ne: "Nzambi, mêmè ne nsongàalùmè awu, mêmè ne muntu awu, s'tudi bàà bukole bumwe."

Dìbà adi, ndi mumanye ne matuku àànyì mmabala. Ndi mumanye ne kakwèna mwa kwikala kabidi ntàntà mupitèpìte bule to. Ndi nkènzakana, ndyàmbidila ne: "Cìndi mwa kwenza ncinyi, Mukalenge? Ngambùlwishèku. Ncyèna muswe kuya kumpala Kwebe to. Ndi muswe kushàala anu—anu paanyima peebe Wêwè. Wêwè lombòla njila." Ndi ntàngila, ndyàmbidila ne: "Ne bidimu makumi ataanu ne bisambombo, kaa, ekelekele, kakwèna mwa kwikala kabidi ntàntà to!"

<sup>205</sup> Dya mpwekesha mèsù, mmòna mulunda wanyì Bill Dauch musòmbè pààpa, ne bidimu makumi mwandamutekete ne bibidi anyì makumi mwandamutekete ne bisatu. Nkènzakana, mmòna bânà aba, bèèla meeji ne: "Ee, mêmè nèngìndilè too ne pândi mfika bukole bumwe ne Mwaneetu Branham, kadi nshiishè kwela awu meeji." Wêwè munanga wanyì, bìdi mwa kwenzeka ne kùyiku mwa kumona ciine aci to. Ndi ngeela mpatà bikole menemene ne neùcimòne. Wamònu anyi? Kadi, ela anu meeji ne, bu Mwaneetu Bill Dauch mwa kwikala ne mwoyi kupicisha dituku edi, yêyè neàlaale kupita bantu nkama bàà bidimu dikumi ne bitaanu, dikumi ne bisambombo. Bòbò abu's bàdi bàfwa dìbà dyònsò edi.

Pa nanku bidimu byùdi naabi bìdi bìshintulula cinyi? Cyùdiku wenza ncinyi pa bìdi bitàngila dìbà dyùdi ne mwoyi? Cyùdiku wenza bwa Yesu ncinyi pa dìbà edi? Nwamonu anyi?

Kaa, mêmè ndi muswe kuMumona. Ndi muswe kumòna dîbà dîngàatàngilà e kumòna mibidi yònsò eyi mishintulula, nyimòna “mishintùlùke mu katanci, mu mubùnyi wà dîsù.” Kabîyi nanku to, dîbà adi twètù ki bàdi bantu bàà batàmbe kukùtakana; dyàku, nwàku, ne cyònkómokààku, bwalu màalabà ufwàfwa; wamonu’s, udi anu bu mùdi nyama amu, ufwà ne uya ku buloba ne pààkù kùmba kùjika. Kadi kùdi wa cifwàka . . . musuuka wùdi kawùyi wa cifwàka mwikàle ne mwoyi munda mwebe amu, mwaneetu. Twètù’s tukàadi bumvwe Dyulu dyàkula neetu. Tukàadi bacimòne cijaadikùibwe. Tudi bamanyè ne Yèyè ùdikù, ne mufuci wa aba bàdi bènda bàkèbangana Nendè ne lukunukunu.

Mpindyewu, nwênù bidimba bya Mubidi wà Kilisto, patùdi tuwimba cyakabidi apa, ndi muswe bwa nwikalè anu basòmbe mu nkwasu yenu amu ne nulabulangana ku cyanza muntu ne mukwèndè patùdi twimba cyòci aci cyakabidi apa.

Ndi . . .

Ela anu mwaneenu wa balume, wa bakaji awu mwoyi.

ndi muMunange

Bwalu . . . (Richard!) . . . kumpala

Ne wàkampetela lupandu

Pa mucu wà Kalvariyo.

<sup>206</sup> Nudi baMunange anyi? Ambàayi ne: “Amen.” [Disangisha didi dyamba ne: “Amen.”—Muf.] Nudi banange Dîyi Dyèndè anyi? Ambàayi ne: “Amen.” [“Amen!”] Nudi banange bwalu Bwèndè anyi? Ambaayi ne: “Amen!” [“Amen!”] Nudi banange Mubidi Wèndè anyi? Ambàayi ne: “Amen!” [“Amen.”] Dîbà adi, nudi banangàngane muntu ne mukwèndè. Amen! Ncyu bushuwa. “Ku eci bantu bònsò nebàmanyè ne nudi bayiidi Bàanyi, panùdi nunangangana muntu ne mukwèndè.”

Mpindyewu ngàatentèki byanza pa mishwalà eyi, piikalàbi bikèngela bwa nwênù kuyàngata kumpala kwa dilòlò edi.

<sup>207</sup> Nèndombèku bwa Mwaneetu Richard Blair . . . Nzambi mmwandamune ku disambila dyèndè, yèyè ne mwaneetu wa balume ewu, basambile dituku adi, bwa kwaluja mwànà mukese wa balume udi musòmbe munkaci mwetu leelu ewu ewu, udi ne mwoyi ewu, bwa diitabuuja dyabo mu Nzambi. Mpindyewu nèmmulòmbèku bwa kutùtangalajayè ne mwaku wà disambila, mu katanci kakese cyanààna, bwa twamònakù mwa kwalukila cyakabidi dilòlò edi.

Dîbà dicidi anu tusunsa bu tutaanu nanku paanyima pàa nkànkala, bilondèshile ntankù wàwa. Nenku ndi muswe bwa nwàlukilè dilòlò edi, panwikalà ne mushindu, panwikalàpu. Byòbi bikèngela bwa nwênù kwalukila ku mèènù, Nzambi ànwèndèshèku mu njila, ne ànwàmbùlwishè, ne ànùkùbè. Nwênù ne mushindu wà kushààla, ne baswè kushààla

tudi tunùjingila dishààla dilenga. Nzambi ìkalèku neenu mpindyewu.

Too ne patwàsangilà! too ne patwàsangilà!

Too ne . . .


Twèlàayi byanza byetu muulu kùdiYe.

. . . patwàsangilà ku makàsà a Yesu;

Too ne patwàsangilà! too ne patwàsangilà!

Nzambi ìkalè neenu too ne patwàsangilà  
cyakabidi.

[Mwaneetu Branham wàbangi kwimbila mu matama *Nzambi Ìkalè Neenu*—Muf.] Ki mushindu wà kuumuka mu nzubu wa Nzambi ngwôwò awu, mu nyuma wa disambila, ne didipwekesha, batwishìbwe ne netùsangilè cyakabidi dilòòlò edi. Twètù katùyi basangile to: “Nzambi ìkalè neenu too ne patwàsangilà cyakabidi!”

Twìnyikààyaaku mitu yetu mpindyewu. Mwaneetu Blair. 

*KUTEETA BWA KWENZELA NZAMBI*  
*MUDIMU KACIYI DISWA DYÀ NZAMBI* LUA65-0718M  
(Trying To Do God A Service Without Being The Will Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 18 a ngondo wa mwandamutekete, cidimu cya 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kâàdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)